



Н. В. ГОГОЛЬ
**РОЖДЕСТВО
АРАФАСИДАГИ
ТУН**



Узбекистон ЙКСМ Марказий Комитети
«ЕШ ГВАРДИЯ» нашриёти
Тошкент — 1980

**Русчадан Наби Алимуҳамедов
таржимаси**

ИҚКИНЧИ НАШРИ

© Издательство «Ёш гвардия», 1980



Fождествога бир кун қолган эди, у ҳам ўтди. Булутсиз қиши кечаси бошланди. Юлдузлар чарақлаб чиқди. Ой ҳам, яхшиларнинг йўли ёрисин, олам рўшно бўлсин, ҳамма шодхурсанд қувониб ёрамазон¹ айтсин, Ислайҳиссаломга мадҳ ўқисин, деб осмонга виқор билан кўтарилиди. Совуқ кундузгидан кучлироқ. Аммо, шун-

¹ Бурунги вақтда Украинада «Колядка» айтиш одати бор экан. Бу бизнинг «ёрамазон»га ўхшаб кетганидан уни «ёрамазон» деб таржима қилдик. (Тарж.)

«Бизда эртага рождество деган куни кечқурун одамларнинг эшигига бориб қўшиқ айтишни колядовать дейдилар. Уйнинг эгаси колядка айтиб келган кишининг тўрвасига колбасами, нонми, ёки чақами, ишқилиб, ҳар ким топганини ташлайди. Бир замонларда Колядка, деган бир тентак ўтган экан, уни авлиё ҳисоблаган эканлар. Колядка айтиш шундан қолган экан. Ким билсин, ростми, ёлғонми? Буни мухокама қилиш биздек нодонларнинг иши эмас. Ўтган йили Осип ҳазрат, колядка айтиш, шайтонни шарафлаш билан teng, деб таъқиқламоқчи бўлган экан. Аммо тўғрисини айтганда, колядкада бояги Колядка ҳақида бир оғиз ҳам сўз йўқ. Кўпроқ Исонинг туғилгани тўғрисида қўшиқ айтадилар, кейин охирда уйнинг эгасини унинг бола-чакаварини «Ало қиладилар», Аричининг шархи. (Гоголь изоҳи).

дай сокинлик эдики, оёқ остидаги қорнинг ғарчиллаши ярим чақиридан эшитиларди. Ўспириналар ҳали дераза тагида тўпланишганлари йўқ. Ёлғиз ойгина ясанган қизларни ғарчиллама қорга тезроқ чиқинглар, деб чақириётгандай дарчалардан мўраларди. Бир уйнинг мўрисидан бурқираб тутун чиқиб, осмонга кўтарилиди, тутун ичидаги супурги мингандаги ялмоғиз ҳам осмонга чиқиб кетди.

Агар шу пайтда сорочинлик суд маслаҳатчиси фуқарога қарашли отлардан учтаси қўшилган аравада, сарвоз йигитларникидек қундузи телпак, адипига қора барара тикилган пўстин кийиб, тўқима қамчинини силкитиб ўтиб қолса, дарҳол ялмоғизга кўзи тушган бўларди, чунки дунёдаги бирорта ҳам ялмоғиз унинг назаридан қочиб қутулолмаган. Қайси беканинг чўқаси нечта туққанини, кимнинг сандигида қанча бисоти борлигини, саҳий киши улуғ байрам кунида бисотидан, рўзғоридан нимасини олиб чиқиб арақхонага гаров қўйишини ҳам билади. Аммо сорочинлик суд маслаҳатчисининг йўли бугун буёққа тушмади, тушганида ҳам, бошқалар билан унинг нима иши бор, ўзининг ташвиши кўп. Аммо ялмоғиз шундай баландга чиқдик, пастан қора доғга ўхшаб кўринди. Доғ осмоннинг қаерига борса, юлдузлар бирин-сирин ғойиб бўлаверди. Ялмоғиз бирпасда енгини юлдузга тўлдириб олди. Осмонда уч-тўрттагина юлдуз қолди, холос. Шу пайт нариги томондан ҳам қора доғ пайдо бўлиб, чўзилиб, бирпасда улғайиб кетди. Шабкўр одам кўзойнак эмас, комиссар аравасининг фидирагини бурнига тақиб олса ҳам бу нарсанинг нималигини билолмас эди.

Олдидан қараганда немис¹нинг худди ўзи: бир зум тек турмасдан нимани кўрса ҳидлайдиган тумшуғи

¹ Французы, руминми, шведми, ишқилиб, бошқа юртдан келганларнинг ҳаммасини бизда немис, дейдилар. (Н. В. Гоголь и з о х и).

чўчқанинг тумшуғига ёки думалоқ чақага ўхшарди, оёқлари чиллакдай: агар Ярески¹ қишлоғи даъвошисининг оёқлари шунаقا бўлса, бир ўйин тушишда синар эди. Аммо орқасидан қараганда мундир кийган губернатор стряпчий²нинг худди ўзи эди, чунки ҳозир расм бўлган мундирнинг орқа томонида узун ва ингичка этағи бўлганидек, унинг ҳам ингичка, узун қўйруғи бор эди. Фақат ияги тагида осилиб турган такасоқоли, бошидаги шоҳчаси, мўри тозаловчидан баттар қоралиги, унинг немис ҳам эмас, губернатор стряпчийси ҳам эмас, балки ёруғ дунёда охирги кун тентираб, яхшиларни йўлдан оздириб юрган, эртага эрталаб қўнғироқлар чалиниши билан думини қисиб, орқасига қарамасдан жаҳаннамга кириб кетадиган шайтоннинг ўзгинаси эканини кўрсатиб турарди.

Бу орада шайтон ойни ўғирлаш пайида секин-секин келаверди, қўлини узатиб, ойни ушламоқчи ҳам бўлди-ю, лекин қўли куйгандек, тортиб олди, бармоини оғзига тиқиб сўрди. Кейин нариги томондан келиб ушламоқчи бўлди, тагин қўлини тортди. Аммо айёр шайтон шунча панд еса ҳам, сира тинчимасдан, шайтонлигини қиласкерди. Югуриб келиб, икки қўли билан ойни ушлаб олди; чилим чекмоқчи бўлган одам чўғни қўлидан қўлига олиб, уф-уфлагандек, у ҳам афти башарасини бужмайтириб, ойни у қўлидан-бу қўлига олиб совутгандай бўлди-да, дарров чўнтағига солиб, ҳеч нарса кўрмагандек юрганча кетаверди.

Шайтон ойни ўғирлаб кетганини Диканъкадагиларнинг ҳеч қайсиси сезмади. Лекин бўлус миrzаси арақхонадан эмаклаб чиқаётганида осмондаги ой бирдани-

¹ Ярески — Полтава губерняси. Миргород уездидаги бир қишлоқ.

² Стряпчий — Рўзғор ишларини олиб борувчи сарой ходими.

га қимирлаб ўйинга тушиб кетганини кўрган экан: азбаройи худо, деб қасам ичса ҳам қишлоқдагиларнинг ҳеч қайсиси ишонмасдан, уни масхара қилиб кулдилар. Аммо шайтоннинг бундай қонунга хилоф иш қилишининг боиси нима? Сабаби бор эди: бой Чубни мунши мөҳмондорчиликка чақирганини билар эди. Бу мөҳмондорчиликка даъвошидан бўлак муншининг қариндоши, черковда ниҳоят даражада йўғон овоз билан ҳофизлик қиувчи кўк сюртук кийган ҳофиз, яна казак Свербиғуз ва яна бир неча киши чақирилган эди. Бу мөҳмондорчиликда рождество оши — майиз солиб пиширилган гуручдан бўлак яна заъфар қўшилган арақ ва бошқа турли туман лазиз овқатлар бўладиган эди. Отаси мөҳмондорчиликка кетганда бутун қишлоққа гўзаллиги билан номи кетган қизи уйда ёлғиз қолади. Ёлғиз қолган қиз олдига норғул азамат темирчи йигит келса керак. Шайтон уни Кондрат бузрукнинг хутбаларидан ҳам баттар ёмон кўради. Темирчи ишдан бўш вақтларида сураткашлик ҳам қиласиди ва бу атрофда ундан уста наққош йўқ эди. Юзбоши Л... ко-нинг ўзи, тириклигига уни Полтавага чақириб, ҳовлисининг тахта деворини бўятдирган эди.

Диканъка қишлоғидагиларнинг карам шўрва ичадиган товоқларини ҳам шу темирчи бўяған эди. Темирчи художўй одам бўлиб, кўпинча азиз-авлиёларнинг суратларини чизар эди. Т... даги бутхонада темирчи чизган, инжил ёзгали Луканинг сурати ҳали ҳам бор. Аммо темирчи бутун ҳунарини бутхонанинг ўнг томонидаги ҳужра деворига солган суратда кўрсатганди. Бунда қиёмат куни қўлида бир шода калит билан дўзахдан шайтонни ҳайдаб чиқазаётган авлиё Петрнинг тасвирини солганди. Шайтон куни битганини билиб, қўрққанидан ўзини ҳар тарафга урап, дўзахдаги гуноҳкорлар қамчинми, палёнми, ишқилиб қўлларига нима тушса шу билан

уриб қувлар эдилар. Наққош бу суратни катта тахтага солаётганда шайтон унга қўлидан келганича ҳалақит берди. Қўлидан туртиб, босқон остидаги кулни тўзитиб сурати устига сочар эди. Лекин шайтоннинг бу ғаламислигига қарамай суратни чизиб бўлиб, тахтани черковни деворига қоқиб қўйган эди. Ана шундан бери шайтон ундан ўч олмоқчи бўлиб яниб юарди.

Ёруғ дунёда яна бир кунгина изғиши қолди; бир кун қолган бўлса ҳам, шу кеча темирчидан бир илож қилиб аламини олмоқчи бўлди. Шунинг учун борадиган жойи анча узоқ бўлганидан, кекса Чуб эриниб бормасин, деган мақсадда бу ишларни қилган эди. Муншиникига қишлоқни ёнлаб, тегирмондан, гўристондан ўтилгач, жарликдан айланниб борилар эди. Ойдин кечада заъфар солинган арақ ва меҳмондорчилик уни тинч қўймаган бўларди. Аммо бундай қоронғи кечада бирорта одам уни печкасидан тушириб, уйидан чиқазолмаса керак. Аввалдан Чуб билан чиқишмайдиган темирчи зўр бўлгани билан ота борида қизнинг олдига боришга юраги дов бермасди.

Шундай қилиб, шайтон ойни чўнтағига солиши билан оламни шундай зулмат босдики, унақа-бунақа одам муншиники ўёқда турсин, арақхонани ҳам тополмас эди. Ялмоғиз бирданига қоронғида қолиб чинқириб юборди. Шайтон дарров йўргалаб келиб унинг тирсагидан ушлади-да, одатда хотин зоти қулоғига қандай шивирланса у ҳам ялмоғизнинг пинжига кириб, шундай шивирлаб кетди. Дунёнинг ишлари ғалати-да! Оламдаги махлуқларнинг бариси бир-бирининг қилигини ўрганишга, бир-бирини эрмак қилишга уринади. Бурун Миргородда судья билан шаҳар ҳокимигина қишида мовут қопланган калта пўстин кияр эдилар, бошқа майда-чуйда амалдорлар тери пўстин киярдилар. Энди бўлса, суд аъзоси ҳам, даҳа судъяси ҳам барра теридан янги пўстин тик-

дириб, мовут қоплатиб олибдилар. Дафтарчи билан бўлус мирзаси ҳам бурноқ йили кўк хитой матонини газини икки миридан олибдилар. Пономарь¹ бўлса катак-катак методан ёзлик чолвор, йўл-йўл жун методан камзул тикдирибди. Хуллас, ҳамма одам қаторига кирмоқчи бўлади. Бу одамлар қачон тинчишаркин. Бао боғлайманки, шайтон ҳам ўзини одам қаторига қўшганини кўрсалар, кўплар ҳайрон бўладилар. Ҳаммадан ёмон таъсир қиласидиган жойи шуки, шайтон ўзини жуда кўхлик деб ўйлар, ҳолбуки кўрган одамнинг кўнгли айнир эди. Фома Григорьевич айтгандай, башараси тавия-ю, аммо, шайтон ҳам муҳаббатни қўмсайди! Бироқ, осмону ерни шундай қоронгилик босдики, ялмогиз билан шайтон ўртасида кейин нима гаплар ўтганини сира кўриб бўлмади.

Чуб уйидан чиқаркан, қотмадан келган, новча, калта пўстин кийган, мужиклар соқол қирадиган чалғи синифи икки ҳафтадан бери бетига тегмаганидан соқоли ўсиб кетган кишига:

— Ҳали, оға, муншининг янги уйини кўрганим йўқ, дегин? Бугун у ерда яхшигина майхўрлик бўлади! — деди-да, оғзи қулоғига еткудек илжайди. — Ишқилиб кеч қолмасак бўлгани...

Чуб шундай деб, пўстини устидан маҳкам боғлаб олган белбоғини ростлади, бошидаги телпагини бостириб кийди, хира итларнинг кушандаси бўлган қамчини дастасини маҳкамроқ ушлади, лекин шу пайт осмонга қараб тўхтади...

— Нима бало! Уни қара! Уни қара, Пана!

Оғайниси: «Нима?» деб сўради-ю, у ҳам бошини кўтариб юқорига қаради.

¹ Пономарь — православ черковида жом чалувчи.

— Ниманг нимаси, ой ғойиб бўлибди.

— Нима бало бўлди? Ҳақиқатан ой йўқ-ку.

Чуб, оғайнисининг бепарволигидан хафа бўлиб:

— Ҳамма гап йўқлигига-да, парвойи палаксан-а, — деди.

— Қўлимдан нима келарди!

Чуб енги билан мўйловини артаркан, гапини давом әтдирди:

— Нонуштага бир рюмка арақ насиб қилмағур қандай шайтон аралашибди-я!.. Худди масхара қилгандай-я... Уйда ўтирганимда атайн ойнадан қараганидим! Жуда яхши ҳаво эди. Ёп-ёруғ, қор ойдинда йилтирас эди. Куппа-кундузидек ҳамма нарса равшан кўриниб турувди. Эшикдан ташқарига чиқар-чиқмас олами қоронгилик босди!

Чуб жавраркан, муншиникига борайми, бормайми деб анчагача ўйланиб турди. Бориб уёқдан-буёқдан ҳангома қилиб ўтиргиси бор. Даъвоши билан қалъалик ҳофиз аллақачон келиб ўтиришгани аниқ; ҳар ўн беш кунда Полтавага қатнаб турадиган асқиячи мойфуруш ҳам аллақачон боргандир. Бу киши гап бошлаганда атрофидагилар ичаги узилгудек бўлиб кулишарди. Чуб дастурхондаги арақни ҳам хаёлан кўриб турибди. Бу унинг нафсини қитиқлар эди-ю, лекин тун қоронғиси ҳамма казакларга тааллуқли бўлган ялқовликни ҳам қўзғатар эди. Сўрига чиқиб, ёнбошлаб трубка чеккан, дарча тагига тўпланишиб ўйин-кулги қиласиган йигит ва қизларнинг қўшиқларини эшишиб мудрагани яхши эмасми! Агар ёлғиз ўзи бўлса-ку, албатта уйда маза қилиб ўтиради-я, лекин икки киши қоронғида юришдан қўрқишмайди ва зерикишмайди ҳам. Бунинг устига, бошқалар олдида ўзини қўрқоқ ва ялқов қилиб кўрсатгиси келмади. Жавраб бўлиб, ҳамроҳига қараб:

— Шундай қилиб, ой йўқми? — деб сўради.

— Йўқ.
— Таажжуб-а! Қани, тамакингдан ол, ҳидлайлик! Тамакинг жуда яхши-да! Қаердан оласан?
— Қаёқда яхши! — деди ҳамроҳи гулдор тамаки қутисини ёпаркан. — Қари товуққа ҳам таъсир қилмайди!..

— Эсимда, марҳум арақфуруш менга Нежиндан тамаки келтириб берган эди, хўп тамаки эди-да! Ниҳоятда яхши эди! Хўш, оғайнини, нима қиласиз, жуда қоронғи-ку... — деб Чуб яна ўша зайлда гапирди.

Ҳамроҳи эшикнинг тутқичини ушлаган жойида:
— Бўлмаса, бормай қўя қоламиз, — деди.
Агар оғайниси қоламиз демаса, Чуб бормас эди, аммо, энди қайсарлиги тутиб.
— Йўқ, оғайнини, бормасак бўлмайди! — деди.

Айтди-ю, дарров айтганига пушаймон қилди. Бундай тунда сира боргиси келмасди. Аммо, бирорнинг маслаҳатига кирмай ўз билганини қилиб, кажлигини кўрсатганлигига хурсанд эди.

Оғайниси, уйда ўтирадими, кўчага чиқадими, унга бари бир бўлганидан, чеҳрасида ҳеч бир пушаймон аломатини кўрсатмай бепарволик билан атрофга қараб қўйгач, қамчи дастаси билац елкасини қашиб қўйди-да, кейин иккови йўлга тушишди.

Энди гўзал қиз уйда ёлғиз қолиб нима қиласётганини кўрайлик. Оксана ҳали ўн етти ёшга тўлмаган, лекин Диканъканинг ўёғида ҳам, буёғида ҳам ҳамманинг оғзида у. Оксанадек қиз қишлоқда сира бўлмаганлиги ва бундан кейин ҳам бўлмаслиги тўғрисида йигитларнинг бариси яқдил эди. Оксана ўзи ҳақидаги гапларни эшигган, билганидан, ўзини мағрур тутиб, ноз-карашма қилилар эди. Агар тивит юбка, чит пешбанд киймай, тузукроқ узун кўйлак кийса, ҳамма қизларни йўлда қолдирив кетар эди. Йигитлар гала-гала бўлиб унинг кетидан

юришар, умидлари пучга чиққач, бошқа, унчалик кек-каймайдиган қизлар билан бўлиб кетардилар. Битта шу темирчи умидини узмай, қизнинг кетидан ўжарлик қилиб юраверарди. Қиз рўйхуш бермасдан, бошқаларга қилган муомаласини қилса ҳам, у ўз билганидан қолмасди.

Отаси чиқиб кетгандан кейин, қалай гардишли кичкина ойнага қараб, анчагача ўзига зеб берди.

Ўз-ўзи билан шунчаки гаплашмоқчи бўлиб, паришонлик билан аксига қараганча: «Одамлар менинг нимамни мақтайдилар! Бекор айтадилар, кўҳлик эмасман!»— деб қўйди. Аммо ойнада кўринган анордек юз, ундағи қора кўзлар, кўнгилга ўт солувчи ажабтовур чиройли табассум, бунинг тескарисидан далолат қиласди. Гўзлал қиз қўлидан ойнани қўймай: «Қора қошим ва кўзимнинг дунёда мисли йўқми? Қанқайган бурнимнинг нимаси яхши? Бетимнинг, лабимнинг нимаси яхши? Қора сочимни яхши дейдилар!? Ваҳоланки, уни кечаси кўрган одам қўрқиб кетади. Қора чағир илондек бошимни ўраб, чулғаб олибди. Энди билсам, менда гўзалликдан асар йўқ!» деб, ойнани нари суриб қўйди-да, қичқирди: «Йўқ, чиройлиман! Вой, қандай аломат ҳусним бор! Малакман! Менга уйлা�нган йигит баҳтли бўлади! Эрим ҳуснимга қараб тўймайди! Эсини йўқотиб, ўпавериб ўлдириб қўяр».

Оҳистагина кириб келган темирчи секин шивирлади:

— Ажойиб қиз! Мақтаниши ҳам ҳазилакаммас! Бир соатдан бери ўзини ойнага солиб томоша қиласди-ю, тўймайди, тағин ўзини-ўзи мақтаб ҳам қўяди!

Зебо қиз нозланиб ҳануз ўз-ўзи билан гаплашарди:

— Ҳой, йигитлар, сизга тенгманми мен, менга қаранг, хиромон юришимга боқинг, кўйлагим қизил ипак матодан. Бошимдаги ленталаримни қаранг! Бундай зарбоп матоларни кўрмоқ сизга умрбод насиб бўлмас! Қалли-

ғим ер юзидағи энг мард йигит бўлсин, деб отам олиб берган буларни! — Жилмайиб қайрилиб ёнига қараши билан кўзи темирчига тушди.

Қичқириб, хўмрайиб йигитнинг рўпарасида тўхтади.

Темирчи сўррайиб, қўллари шалвираб туради.

Гўзал қизнинг қорачадан келган кўҳлик юзи қандай туйғуларни изҳор қилаётганини билиш қийин эди. Унинг чеҳрасида қаҳр билан бирга, ўзини йўқотиб қўйган тақачини майна қилиш ҳам бор. Ҳафсаласи пир бўлиб юзи сал қизаринқираб товланди. Бу унинг ҳуснини шундай очдики, таърифга сифмай кетди. Шу пайтда темирчи уни миллион мартаба ўпиб-ўпиб олмоқдан ўзини зўрға тутиб қолди.

— Нега келдинг? — деди гап бошлаб Оксана. — Қўлимга курак олиб ҳайдайми? Хўп уста бўлибсиз-да ҳаммангиз шилқимликка! Отамиз уйда йўқлигини дарров фаҳмлай қоласиз. Сиздақаларни яхши биламан! Сандинум битдими?

— Жоним, битиб қолди, ҳайитдан кейин битади. Қанча овора бўлганимни билсанг эди! Икки кеча устахона намдан чиқмадим. Аммо бирорта ҳам роҳибнинг қизида йўқ сандиқ қилиб бераман-да! Қопламасига шундай темир қилдимки, Полтавага ишлагани борганимда юзбoshининг аравасига ҳам бундай асил темир қопламаган эдим. Нақшини шундай чиройли ясаяпманки! Оппоқ оёғинг билан бутун юртни айланиб чиқсанг ҳам бундайни тополмайсан! Атрофида қизил, кўк рангдаги гуллар бўлади. Менга жабр қилма! Бирпас гаплашиб ўтиришга, ҳуснингни томоша қилишга рухсат эт!

— Ким сенга йўқ деди, гаплашавер, томоша қилавер!

Қиз курсига ўтириб яна ойнага боқди, ўзига оро бериб, сочини тузатди. Бўйнига, ипак гул солиб тикилган кўйлагига қараб қўйганида, лаъл лабида, анордек бетида, шаҳло кўзида ўзидан завқланиш зоҳир бўлди,

— Енингда мен ҳам ўтирсам майлими? — деди темирчи.

— Ўтири, — деди Оксана чиройини бузмай, юз-кўзи-даги шодонликни сақлаб.

— Гўзал Оксана, карам қил, бир ўпай! — деди-ю, темирчи ўзини дадил тутиб, қизни ўпмоқчи бўлиб, оғушига тортиб қучоқлади. Аммо Оксана темирчининг лабларига яқин келиб қолган бетини опқочиб, уни итариб юборди.

— Тағин нималар истайди кўнглинг? Асал бергаč, қошиқ ҳам бер, дейсанми! Йўқол, қўлларинг темирдан баттар. Ўзингдан ҳам тутун ҳиди келади. Ҳамма еримни қоракуя қилган бўлсанг керак.

У яна ўзини ойнага солиб ўзига оройиш берди.

Темирчи бошини ҳам қилиб, ичиди: «У мени яхши кўрмайди, у ҳеч кимни назар-писанд қилмайди, мен бўлсам унинг олдида аҳмоқ бўлиб, кўзимни ундан узмасдан мўлтайиб ўтирибман. Тикилиб тураверардим, юз йил бўлса ҳам кўзимни олмасдим! Аломат қиз! Кўнгли кимдалигини, кимни севишини билолсам, ҳар нарса деся берардим. Аммо у ҳеч кимни ёқтираса керак, ўзига ўзи шайдо. Мен бечорани қийнайди, мен шўрлик унинг кўйида куяман, рўшнолигим йўқ, унга муҳаббатим шунчаликки, дунёда ҳеч ким бирорни мендек севган эмас, бундан буён ҳам севмайди!» — деб ўйлади.

— Сенинг онанг ялмоғизмиш, ростми? — деб кулиб юборди Оксана. Темирчининг назарида бутун ич-таши кулиб юборгандек бўлди. Бу кулги бирваракайига кўнглига ҳам, оҳистагина жимиirlашиб кетган қон томирларига ҳам таъсир қилгандай бўлди ва бундай ёқимтой кулган бетдан ўполмагани алам қилди.

— Онам билан нима ишим бор? Онам ҳам, отам ҳам, бу дунёда нимаики менга азиз бўлса, ҳаммаси сен-сен. Агар подшо мени чақириб; темирчи Вакула, менинг дав-

латимда нимаики яхши нарса бўлса сўра, ҳаммасини бераман. Олтиндан сандон, кумушдан болға қилдириб бераман, деса, йўқ, керакмас, қимматбаҳо жавоҳирлар ҳам, олтин сандон ҳам, мамлакатинг-у, юртинг ҳам менга керакмас. Оксанамни берсанг бўлгани, дердим!

— Вой, сени қара-ю! Бироқ, отам ҳам хўп анойи эмас, онангни олмаганини кўрасан,— деб Оксана айёрлик билан кулиб қўйди. — Нега қизлар ҳалигача келмаяптилар-а... Нима бўлди экан? Рамазон айтадиган вақт бўлиб қолди. Зерикиб кетаётибман.

— Гўзалим, қўйсанг-чи, худо ўзи ёр бўлсин уларга!

— Нега энди! Улар билан йигитлар ҳам келишади! Ана ўшанда ўйин бўлади-да. Ҳали қандай қизиқ нарсалар гапириб беришади!

— Улар билан бўлсанг хурсандмисан?

— Албатта, сендан кўра улар билан яхши-да! Э, шошма! Бирор тақиллатди, қизлар билан йигитлар келишди шекилли.

«Энди нима умидим қолди. Мени майна қилса, унинг олдида занглаган тақачалик қадрим йўқ. Лекин ўзимни бошқаларга масхара қилдириб қўймайман. Унга мендан кўпроқ ёқсан йигитни билсан, таъзирини бериб қўяман...» деди ўз-ўзига темирчи.

Эшикнинг қаттиқ тақиллагани, совуқда қулоққа нохушроқ әшитилган «оч» деган овоз унинг хаёlinи қочирди.

Аламига чидолмаган темирчи, дуч келган одамнинг оч биқинини тешаман, деган ниятда «тура тур, ўзим чиқиб очаман», деб эшикка чиқди.



Совуқ зўрайиб, осмон шундай совиб кетдики, шайтон музлаб қолган қўлини сафал иситиб олмоқ учун,

туёғида сакраб, муштумига күх-куҳларди. Эртадан кечгача дўзахда юргач, бу совуқда қотмасдан бўладими? Дўзахда бизнинг қишимиздагидек совуқмаслигини биласиз. Дўзахда бўлса шайтоқ қалпоғини кийиб олиб, баковулбошидек ўчоқ тепасига миниб олиб, гуноҳкорларни қовургани-қовурган эди. Хотинлар байрамда қандай меҳр билан колбаса қовурсалар, шайтон ҳам гуноҳкорларни шундай иштача билан қовуради.

Қалин кийинганига қарамай, ялмоғиз ҳам тўнгиб қолди. Шунинг учун, яхмалак отаётган одамдек икки қўлинини тепага қилиб, оёқларини керганича, ҳеч бир бўғимини қимирлатмай, ҳаводан пастга тушди, худди муз тепадан сирғаниб тушгандай гизиллаб тушди-ю, тўппатўғри мўрига кириб кетди.

Шайтон ҳам шу зайлда унинг кетидан тушиб кетди. Аммо бу ҳайвон ҳар қандай олифтадан ҳам эпчил бўлганидан, мўрининг оғзидаёқ, маъшуқасининг елкасига миниб олиб, бирпасда иккови кенг печканинг ичига тушиб, кўзачалар орасига кириб қолишли.

Сайр қилиб қайтган ялмоғиз, ўғлим Вакула уйга меҳмон-пеҳмон олиб келмадимикин, деб печканинг қопқоғини суриб мўралади. Уйнинг ўртасида ётган қопдан бошқа ҳеч ким йўқлигини билиб печкадан чиқди, устидаги пўстинини ечиб, ўзини ростлаб олди, энди уни кўрган одам ҳалигина супурги миниб юрган ялмоғизлигини билмас эди.

Темирчи Вакуланинг онаси қирқдан ошмаган, чиройли ҳам эмас, хунук ҳам эмас эди. Қирқ ёшда чиройли бўлмоқ ҳам қийин. Аммо у ҳар қандай сипо эрқакни ҳам ўзига ром қилиб олишга уста эди (аммо буларнинг хушрўйлик билан унча ишлари йўқ эди, буни айтиб қўйсак ёмон бўлмайди), шунинг учун даъвошидан тортиб мунши Осип Никифоровичгача (албатта, хотини уйда бўлмаса) казаклардан Корний Чуб, Қасъян Свербиғуз-

гача ҳамма уникига кириб турар эди. Унга қойил бўлмоқ керакки, буларнинг барисига жуда усталик билан муомала қилар, ҳеч қайсиси рақиби борлигини кўнглига ҳам келтирмас эди. Художўй фақир мужикми, ёки мовут чақмон кийганлари учун ўзларига асилзода номини қўйиб олганларми, ёки якшанба куни бутхонага, ҳаво ёмон бўлса арақхонага бора туриб, қаймоқ билан мазали чучвара егани, иссиққина уйда меҳмондўст хотин билан ҳангомалашгани Солоханига албатта кириб ўтарди. Асилзода арақхонага кета туриб, атайнин йўлни айланиб ўтса ҳам, йўлакай кирдим, дер эди. Ҳайит куни Солоха хитойи ипак кофта ва орқасига зар уқа қадалган кўк юбкасини кийиб, ясаниб черковга келганда ҳаммадан олдинга ўтиб, шундоққина меҳроб тагига бориб турсами, мунши албатта бир йўталиб қўйиб, кўзининг қири билан унинг томонига қараб қўяр эди. Даъвоши мўйловини силаб, сочини қулоғи ортига олиб қўйиб, ёнида турган қўшнисига имо қилиб: «Ажойиб аёл-да! Шайтоннинг ўзгинаси!»— деб қўярди.

Солоха ҳамма билан саломлашар, аммо уларнинг ҳаммаси ёлғиз мен билан саломлашяпти, деб ўйлар эдилар. Лекин ҳамма гапдан воқиф бўладиган кишилар, Солоха ҳаммадан кўра Чубга кўпроқ илтифот қилганини дарров фаҳмлар әдилар. Чуб бева эди, уйининг олдида доим саккиз фарам буғдой турар эди. Новдадан тўқиб тўсилган оғилхонада турган икки жуфт ҳўқизи сигирни ёки семиз буқани кўриб қолса, бошини чиқазиб, мў-ў-лаб қўяр эди. Соқолли эчкиси томга чиқиб олиб, ҳовлидаги куркаларни масхара қилгандай, шаҳар бошлиғига ўхшаб маърар, аммо унинг аччиғини чиқазиб, соқолига тегадиган шум болаларни кўрса, орқасини ўгириб олар эди. Чубнинг сандигида бисоти, чопон-у, зар уқа қадалган камзиллари, ипакли матолари кўп, чунки унинг марҳума хотини сатанг бойвучча эди. Кўкинор, карам, кунга-

боқардан ташқари, ҳар йили икки пайкал ерга тамаки ҳам экарди. Солоха бу давлатнинг барисини ўзимниги қўшиб олсан ёмон бўлмас, деган ниятда эди ва буларни ўзиники қилиб олгач, нималар қилишини мўлжаллаб ҳам қўйганидан, қари Чубга кўпроқ илтифот кўрсатар эди. Ўғли Вакула Чубнинг қизини ўзига оғдириб олиб, бор-йўқ давлатни эгаллаб, уни бийлатмай қўймаслиги учун қирқ яшар хотинларнинг ҳаммаси билган макрга қўл урди, яъни Чуб билан темирчини кўпроқ уриштириб қўйишга ҳаракат қилди. Унинг шу ғаламис, айёрги туфайли бўлса керак, баъзида кампирлар, хусусан биронта зиёфатга йиғилишганда ва меъёридан ортиқроқ ичиб қўйганларида у ҳақда гапириб, уни ялмоғизга чиқазиб қўяр эдилар. Хотинлар унинг ип йигирадиган дуқчадек думи бормиш, ўспирин Кизяколупенко унинг бу думини кўрганмиш, ўтган пайшанба кўчада бировнинг олдидан қора мушук бўлиб ўтиб кетганмиш, бир кун попнинг хотини олдига бир чўчқа келиб, хўroz бўлиб қичқирганмиш-да, Кондрат отанинг шапкасини кийиб қочиб кетганмиш, дердилар.

Бир куни кампирлар шу ҳақда гаплашиб ўтирганларида подачи Тимиш Коростявий келиб қолиб, бир кун ёзда худди Петровка байрами олдидан бошига похол қўйиб оғилхонада ухлаб ётганида, кўйлакчан, сочини ёйган ялмоғиз келиб сигир соғиб турганини ўз кўзи билан кўрганини, ялмоғиз авраб қўйгани учун қимирламай қолганини, ялмоғиз сигирларни соғиб бўлгач унинг лабига бир палид нарса суркаб кетганини ва жирканиб куни билан тупуриб юрганини сўзлаб берди. Лекин унинг бу гапларига ишониб бўлмасди; чунки ялмоғиз Сорочинск суд аъзосидан бошқа ҳеч кимга кўринмайди. Шу сабабдан улуғ казакларнинг ҳаммаси, шундай гапларни эшитганларида қўлларини силтаб кетаверар ва «бекор айтадилар, зангарлар», дердилар.

Солоха саранжом-саришта хотин бўлганидан, дарров печкадан чиқиб, уйни йиғиширишга тутинди. Аммо ерда ётган қопларга тегмади; Вакула ўзи олиб келган, ўзи йиғиширсин! Шайтон бўлса мўрига кираётганда, беҳосдан орқасига қайрилиб қараб, бирор билан бошлишиб кетаётган ва уйдан анча нарига бориб қолган Чубга кўзи тушган эди. Дарров печкадан учиб чиқиб, улар олдига ўтди-да, яхлаб қолган қорни тўзитиб соча бошлади. Бирпасда бўрон туриб, ҳавони буюф босди. Ҳар тарафдан қор учиб, пиёдаларнинг юз-кўзларини, қулоқ-бурунларини қоплагудай бўлди. Шайтон бўлса, Чуб ҳамроҳи билан уйга қайтиб кетади ва темирчини ушлаб олиб, бўёқ чўткани анчагача қўлига ололмайдиган қилиб қўяди, деб кўнглини тўқ қилиб, яна мўрига қайтиб келди.



Дарвоқе бўрон бошланиб, шамол кўз очирмай қўйган заҳоти, Чуб йўлга чиққанига пушаймон бўлди, телпаги ни қаттиқроқ бостириб олиб ўзини, шайтонни, ҳамроҳини койиб кетди. Аммо унинг бундай хафалиги ҳам айёрлик эди, чунки бўрон кўтарилганига хурсанд эди. Муншиникига ҳали босган йўлларига қараганда саккиз марта кўпроқ йўл босиш керак. Хуллас, йўловчилар кетларига қайтдилар. Шамол орқадан уради, лекин бўрондан ҳеч нарсани кўриб бўлмасди.

Бир оз юргач, Чуб ҳамроҳига қараб: «Шошма, оғайни, бошқа йўлга кириб кетибмиз шекилли. Битта ҳам уй кўзимга кўринмаяпти. Шундай ҳам бўрон бўладими? Сен сал бурилиброқ анави томонга юр-чи, зора йўл топсанг. Мен буёқдан қарай. Шундай бўронда кўчага судраганини қара, шайтоннинг иши-да, бу! Йўлни топсанг менни чақир, ёдингдан чиқмасин. Баччағар малъунни қара, кўзимга қорни тоза урибди!» — деди.

Бироқ, йўл кўринмас эди. Ҳамроҳи оёғида узун қўнжли этик билан, тентираб-тентираб, ароқхонага бориб қолди. Дунё топгандек суюнганидан, кўчада қолган ҳамроҳини унугиб, устидаги қорни қоқиб, ичкарига кириб баҳузур ўтираверди. Бу орада Чуб ҳам йўл топгандай бўлиб, ҳамроҳини чақириб-бақиришга тутинди, ҳамроҳи овоз бермагандан кейин, ўзи кетаверди. Борса, ўзининг уйи. Уйининг олдига қор уюлиб қолибди, томини ҳам кўриб бўлмайди. Совуқдан тўнган қўли билан эшикни уриб тақиллатиб қизини чақириди.

Эшик очгани чиққан темирчи:

— Кимсан, нима дейсан? — деб бақирди.

Чуб темирчининг товушини таниб, кетига сурилди. Ичида: «Ву менинг уйим эмас экан... Меникига темирчи киролмас эди. Лекин мундоқ қараганда, темирчининг уйи ҳам эмас. Кимники бўлса экан? Ана холос, таниёлмаганимни қара! Яқинда ёш хотин олган Левченко чўлогники бўлса керак. Фақат унинг уйи меникига ўхшайди. Нега дарров келиб қолдим, дедим-а. Аммо Левченко ҳозир муншиникидалигини яхши биламан, темирчи нима қилиб ўтирибди бунда?.. Ёш хотинининг олдига келиб юраркан-да! Яхши, энди тушундим».

Темирчи яқинроқ келиб янада қаттиқроқ дўқ билан:

— Кимсан, эшикма-эшик нима қилиб юрибсан? — деди.

Чуб ичида: «Кимлигимни айтмайин. Манглайи қора, тағин уриб-нетиб юрмасин!» деб овозини ўзгартириб:

— Дуогўй бир одамман, рамазон айтиб келдим! — деди.

— Йўқол, бошни қотирмай! — деди Вакула бақириб. — Нега яна кетмасдан турибсан, йўқол, кет, ҳозир кет!

Чубнинг ўзи ҳам, балога қолмасдан кета қолай, деб туриб эди-ю, аммо темирчининг буйруғи алам қилди.

Худди шайтон линжига кириб, темирчига қаттиқроқ гапир, деб васваса қилаётгандай бўлди. Чуб овозини ҳалигидек бўлакча қилиб:

— Сенга нима бўлди, мунча бақирасан? Нима, рамазон айтгани ҳам қўймайсанми, хоҳласам айтавераманда! — деди.

— Эҳ-ҳа! Тилингни тиймайсанми ҳали!...— Бу гапдан кейин Чуб елкасига яхшигина бир мушт тушганини сезиз қолди.

Кетига озроқ тисланиб туриб:

— И-е, ҳали муштлашмоқчимисан! — деди.

Темирчи яна туртиб:

— Кет-кет! — деб бақирди.

— Сенга нима бўлди, и-е! — деди Чуб.— Ростакамига, жон-жаҳдинг билан уряпсан-а! — Унинг овозида алам ҳам, оғриқ ҳам бор эди.

— Кет, кет, йўқол! — деб әшикни ёпиб олди темирчи.

Чуб кўчада ёлғиз қолиб:

— Ботирлигини қара-я, яқинига бориб бўлмайди. Шошмай тур ҳали, керилма, шаҳар бедарвозами! Сеними, бола, тўппа-тўғри ҳокимга арз қиласман. Темирчилигинг-у, бўёқчилигинг менга писанд эмас. Қани, елкам билан орқамга қарай-чи, кўкариб чиққандир. Баччагар ёмон урди шекилли! Совуқ бўлмаса-ю, пўстинимни ечиб... шошмайтур шайтоннинг темирчиси, мени урдинг, сени шайтон урсин, темирчи дўқонингга жин тексин, шошма, ҳали, сени хўп ўйнатаман! Лаънати, дорга осилгур! И-е, шошма, ҳозир-ку, уйидамас, Солоха ёлғиз ўтиргандир... Ҳа... уйи узоқ ҳам эмас. Борсаммикин! Вақт ҳам шундайки, ҳеч ким келмайди, зора мурод ҳосил бўлса... Лаънати темирчи ёмон урган экан-а!

Чуб елкасини қашиб олиб, йўлнинг бу томонига бурилди. Солохани кўраман деб хурсанд бўлганидан, оғ

риқ ҳам эсидан чиқди, чирсиллаб турган совуқ бўроннинг буюғи ҳам билинмай кетди. Бўрон соқол-мўйловини қор билан шундай совунлаб қўйдики, ҳар қандай чапдаст сартарош ҳам бундай совунлай олмас эди; қор босган шу бетида гоҳда қувонч пайдо бўлиб, илжайиб қўяр эди. Аммо қор бўрони ҳар тарафдан гупиллаб, кўзини очқизмай қўйганда, ҳар қадамда тўхтаб, лаънати темирчи ёмон урди, деб, елкасини силаб, яна йўлга тушар эди,



Эчкисоқол, думли олифта ойни ўғирлаб, ёнида осифлиқ кўлборига солиб қўйган эди. Мўридан чиқиб-кирганида кўлбори печкага илиниб очилиб кетди ва ой фурратни ғанимат билиб, Солоха уйининг мўрисидан осмонга чиқиб кетди. Олам ёришди. Бўрон бўлмагандай, атроф бояги-боягидай. Ерни қоплаб ётган қор кумушдек ярақлади, гўё қор устига биллур юлдузчалар сочилгандек эди. Ҳаво илигандай бўлди. Ўспирин йигит ва қизлар елкаларида тўрвалари биланчувиллашиб ташқарига чиқдилар. Қўшиқлар жаранглаб, рамазон айтиб кирилмаган эшик қолмади.

Ой ажаб товланиб турибди! Бундай хушҳаво кечада қувноқ қизлар, ҳар бир ҳазил, ҳар бир ўйинга тайёр турган шўх йигитлар орасида бўлиш қандай завқли! Эгнингда пўстин бўлса совуқ емайсан, совуқда бетлар яна баттарроқ ёнади. Шўхликка эса шайтоннинг ўзи бошлайди.

Бир гала қизлар елкаларида тўрвалари билан Чубникига кириб, Оксанани ўраб олдилар. Уларнинг чувиллашидан темирчи эсанкираб қолди. Ҳар қайсиси бир-бирининг гапини бўлиб, гўзал қизга бир янгиллик айтгиси келарди, рамазон айтиб йиққан чалпак, колбаса-

ларини халталаридан тўкиб мақтанаар әдилар. Оксана ҳали у, ҳали бу қиз билан гаплашиб, ҳахолашиб кулади.

Темирчи қизларнинг бундай қувончларини кўриб, ҳаваси келар, қизғанчиқлиги тутиб, ўзи бара айтишни яхши кўрса ҳам, лекин ҳозир уни лаънатларди.

Гўзал қиз қувонч билан қизларнинг бирига қараб:

— Ҳой, Одарка! Янги кавуш кийиб келибсанми, мунча чиройли! Зарлиг-а! Толеъинг баландда сани, ҳар нарсалар олиб берадиган кишинг бор. Менга ким олиб беради бунаقا кавушни,— деди.

Темирчи дарров:

— Жоним Оксана, хафа бўлма, сенга унақа-бунақа бойнинг қизи ҳам киймаганини олиб бераман,— деди.

Оксана ялт этиб қаради-да, уни менсимагандек:

— Сен-а? — деди. — Қани, кўрай-чи, мен киядиган кавушни қаердан топиб келаркинсан. Маликанинг оёғидан ечиб келсанг, унда майли!.. — деди.

— Кўрдингми буни кўнгли қанақа! — деб ҳахолаб кулишди қизлар.

Гўзал қиз:

— Рост айтаман. Ҳаммангиз гувоҳсиз, агар темирчи Вакула маликанинг оёғидаги кавушини келтирса, шу онда унга тегаман, — деди.

Қизлар инжиқ гўзални бирга олиб кетдилар.

Темирчи улар кетидан чиқа туриб:

— Масхара қилавер-чи, ҳозир ўзимни-ўзим масхара қиласман, ўйлаб ўйимга етолмай қолдим. Билмадим ақлҳушим қаёққа кетди. Мени севмайди, севмаса севмасин, дунёда ундан бошқа қиз йўқми! Худога шукур, ундан бошқа ҳам қиз бор қишлоғимизда. Нимаси яхши Оксананинг? Ундан рўзгорни эплайдиган тузук хотин ҳам чиқмайди, ясанишдан, ўзига зеб беришдан бошқани билмайди. Энди аҳмоқликни бас қилиш керак,

Бироқ, темирчи узил-кесил Оксанадан кечмоқчи бўлиб турган чоқда, кўз олдида:

«Маликанинг кавушини келтириб берсанг, сенга тегаман!» деб кулиб турган шўхчан юзи кўринди. Бутун вужуди изтиробга тушиб, Оксанадан бўлак ҳеч нарса хаёлига кирмади.

- Бара айтиб юрган қизлар билан йигитлар бир гала бўлиб кўчама-кўча югуришар эди. Аммо темирчининг кўзига ҳеч нарса кўринмас, бир замонларда кўнглини қувонтирган бу ўйин-кулгиларга аралашмасдан ёлғиз борарди.



Бу орада шайтон жуда ийиб кетди. Суд аъзоси поп қизини кўрганда қилган қилиқларни қилиб, Солоханинг қўлларини ўпар, оҳ-воҳ қилиб, кўксини ушлаб, агар кўнглимни олмасанг, ўзимни ҳар нарса қиласман, сувга ташлайман, жонимни тўппа-тўғри сақарга¹ юбораман, дерди дангалига. Солоха унча бераҳм эмас эди, бундан ташқари шайтон билан шерик эди. У кетидан бир нечтасини эргаштириб юришни яхши кўрар, суҳбат қурмаган куни кам бўларди. Бироқ, бу куни кечқурун ёлғиз ўтиromoқчи бўлди, чунки, қишлоқнинг ҳамма улуғлари муншиникига ошга чақирилган эдилар. Лекин иш бошқачасига айланиб кетди. Шайтон боягидай қисти-бастига олиб турганда, тўсатдан даъвошининг йўғон овози эшитилиб қолди. Солоха эшикни очгани чиқиб кетди, дингиллаган чаққон шайтон дарров бир қопга кириб олди.

Даъвоши тумоғидан қорни силкитиб бўлгач, Солоханинг қўлидан бир пиёла арақни ичиб олди, сўнгра бў-

¹ Сақар — дўзах.

рои туриб, тўполон бўлганидан муншиникига бормаганини, Солоханинг уйида чироқ борлигини кўриб, бу кеча у билан суҳбат қурмоқ ниятида буёқча қелганини айтди.

Даъвоши сўзини тамом қилгунча ҳам йўқ эдикি, эшик тақиллаб, муншининг овози эшитилди. Даъвоши шивирлаб:

— Мени бир жойга бекит, мени кўрмасин, — деди.

Солоха, даъвошидек хўппасемиз меҳмонни қаерга бекитишни билмай кўп ўйлади, алоҳа кўмир турган энг катта қоп эсига келиб, кўмирни бочкага афдарди: сўлақмондек даъвоши мўйлови, боши ва бошидаги тумоғи билан қопга кирди.

Мунши уҳ-үхлаб, қўлларини бир-бирига ишқалаганча кириб келди, киргач, меҳмонлар келишмаганига ниҳоятда хурсанд бўлиб, бўрон бўлиб турганига қарамай, сиз билан андак суҳбатлашай деб келдим, деди. У Солохага яқинроқ келди, йўталиб олгач, илжайиб кулди, узунчоқ бармоқлари билан унинг яланғоч семиз қўлини ушлаб туриб, айёрик билан:

— Гўзал Солоха, бу нима? — деб сапчиб ўзини нарироқ тортди.

— Нима бўларди! Қўл-да, Осип Никифорович! — деди Солоха.

Гап бошлаш учун қилган даромадидан ўзи хурсанд бўлиб:

— Ҳм! Қўл денг! Хе-хе-хе! — деб қўйгандан кейин, уйнинг ўёғидан-буёғига юра бошлади.

Яна яқинига келиб, томоғидан ушлаб:

— Азизим Солоха, бу нимадир? — деб яна ҳалиги-дек сапчиб четга олди ўзини.

Солоха унга:

— Осип Никифорович, кўриб турибсиз-ку нималиги ни, бўйним, бўйнимда маржоним! — деди.

— Ҳм! Бўйнингизда маржонингиз. Хе-хе-хе! — деди-да, қўлларини ишқалаб яна юришга тушди.

— Бунингиз нимадир, хотинлар яктоси?..— Мунши узунчоқ бармоқлари билан, қаеринидир ушламоқчи бўлганда эшик тақиллаб, Чубнинг овози эшитилди.

Муншининг юраги ёрилиб:

— Ё рабби, бегона киши-ку! Мёниг тагим нозик, бирор кўриб қолса нима бўлади... Кондрат бузрук эши-тиб қоладилар!.. — деди.

Аммо муншининг хавотири бошқа томондан эди. Ўз хотинидан кўпроқ хавотирда эди: ҳали ҳам хотинининг дастидан бошидаги сочидан битта қолмаган эди, Қалтираб туриб:

— Марҳаматли Солоха, худо ҳақи, бир илож қилинг. Сизнинг яхшилигингиз ҳазрат Лука Китобининг ўн учин... Бирор тақиллатяпти, азбаройи худо, тақиллатяпти! Вой, вой, яширсангиз-чи мени бирон ерга,— деди.

Солоха яна бир қопдаги кўмирни бочкага ағдарди. Жуссаси унча қатта бўлмаган мунши қопга тушиб, ўтириб эди, қопнинг аллақанча кўмир сиққундай жойи бўш қолди,

— Ассалом алайкум, Солоха! — деди уйга кираётиб Чуб.— Мени кўлади деб кутмагандирсан-а? Бемоврут келиб халал етказдим шекиллик...— деди ва гўё бир нарсани билгандай кулимсираб илжайиб қўйди. Унинг бу қилифи, бефаҳм калласи биронта ҳазил-мутойиба сўз айтмоқ бўлиб анча овора бўлганини кўрсатиб турар эди;

— Балки бирор билан ўйнашиб турганмидингиз!.. Битта яримтани яширмадингми-а? — Чуб бу гапларига ўзи завқ қилиб, Солоханинг кўнгли фақат менда, мендан бошқага рағбати йўқ, деган хаёл билан, ич-ичидан қувониб кулиб юборди.— Солоха, қани энди арафингдан келтир. Совуқдан томогим тўнгиб қолганга ўхшайди. Э, худо, рождестводек улуғ байрам олдида ҳавони шун

дай қилассан! Шундай музлатдики, шундай музлатдики, асло қўявер, бай-бай.., қулоқ солсанг-чи, Солоха, қўлларим акашак бўлиб қолди, пўстинимни ечолмайман-а! Бўрон шундай уриб бердики...

Ташқарида бирор эшикни итариб «оч!» деди.

Чуб, шошиб тумоғини оларкан, «темирчига ўхшайди», деб қўйди.

— Ҳой, Солоха, қаерга бекитсанг бекит мени. У бадбахтнинг кўзига сира кўрингим келмайди. Шайтонваччанинг икки кўзига говмича чиқсин!

Солоханинг қути учиб, жинни кишидек нима қиласми билмай гангид қолиб, муншини яширган қопни кўрсатди. Бечора мунши давангидек одам совуқда тўнгигб, ҳали эримаган этиги билан унинг икки чаккасини босгандা ҳам фиқ этмай жим ўтираверди.

Темирчи индамай кирди-ю, бошидан қалпоғини ҳам олмай, тахта устига ёнбошлади. Авзоидан хафалиғи билиниб туради.

Солоха ўғли кетидан эшикни ёпгунча ҳам бўлмай, яна бирор тақиллатиб қолди. Қелган одам казак Свербигуз экан. Буни қопга жойлашнинг иложи ҳам йўқ, чунки у сифадиган қоп топилиши қийин. Унинг жуссаси даъвошиникидан каттароқ, бўйи Чубнинг оғайнисиникидан новчароқ эди. Шунинг учун Солоха унинг гапини яхшилаб эшитмоқ ниятида уни ташқарига чиқариб, анғизга олиб кирди.

Темирчи уйнинг ҳар тарафига паришонҳол аланглаб, узоқда рамазон айтиб юрганларнинг овозига ўқтин-ўқтин қулоқ солиб ўтириб эди. Бир маҳал қопларга кўзи тушиб қолди; нима қилиб ётиби бу қоплар, чиқариб ташлаш керак эди. Аҳмоқона муҳаббат деб, жинни бўлиб қолдим. Эртага байрам бўлса, уй йиғиширилмабди, ҳар бало ивирсиб ётиби. Устахонага обориб ташлай!

Темирчи катта қоплар устига энганиб, аввал яхшилаб бўғиб, боғлаб, кейин орқаламоқчи бўлди. Аммо хаёли паришонлиги шундоқ билиниб турарди, бўлмаса, қопнинг оғзини бўғганда Чубнинг кокилини ҳам қўшиб боғлаб юборганда унинг вишиллаганини, давангидек даъвошини ҳиқичноқ тутиб, ҳиқиллаганини эшитган бўлар эди.

«Бу ярамас Оксана хаёлимдан сира кетмасмикин-а? Ҳеч ўйламай десам ҳам ўйимга келаверади, ўчакишгандек яккаш ўша эсимга келади, холос. Нега бундай экан, киши хоҳламаса ҳам миясига кираверар экан-да? Нима бало бўлди, қоплар оғир тортиб қолибдими? Кўмирдан бўлак яна бирор нарса солинганга ўхшайди. Э, эсим қурсин! Ҳар нарса менга оғир кўринаверади энди, ҳеч эсимда йўқ. Аввал бир мирилик чақани, от тақасини бир қўлим билан икки букаверардим, энди бир қоп кўмирни кўтаролмайман-а! Яқинда шамол эсса йиқиладиган бўлиб қоламан шекиллик». Кейин бир оз индамай туриб, ўзига далда бергандек, «йўқ, мен хотин киши эмасман! Ўзимни ҳеч кимга майна қилдириб қўймайман! Бунақа қопдан ўнтаси бўлса ҳам кўтараман!» деб шовқинлаб қўйди. Сўнгра керилиб, иккита полвон кўтаролмайдиган қопларни орқалаб олди. Ичида шайтон ғужанак бўлиб ўтирган қопни ушлаб, «буни ҳам олайми, асбобларимни солиб қўйган эдим шекиллик» деб, қўшиқ айтганча ташқарига чиқиб кетди.

Хотин олмоқ ҳазил эмас
Ботмон-дахсар эт керак...

Кўчадаги қўшиқ, шовқин-сурон тобора авжига мииди. Яқин орадаги қўшни қишлоқлардан ҳам бир талай одам йифилиб, тўполон қилиб юрганлар яна кўпайди. Ўспирин йигитлар хўп яйраяптилар. Рамазон айтиб юрганлар, гоҳда ёшларнинг биронтаси шу топда тўқиган

қўшиқларни ҳам айтиб юборадилар. Гоҳда жўралар орасидан бирор овозининг борича бақириб, рамазон ўрнига ашур айтиб юборарди:

Шедрик-ведрик
Варақига келдик.
Ош беринг-мош беринг,
Қазидан бир бош беринг.

Ҳаммалари кулишиб, буни айтган қизиқчини хурсанд қиласидилар. Дарчалар очилиб, қартайган эрлари билан уйда қолган кампирларнинг озғин қўллари бир бўлак колбаса, ёки сомса узатар эди. Йигит ва қизлар, «менга-менга» деб талашиб, тўрваларини тутардилар. Бир жойда йигитлар қизларни ўраб олишган: қий-чув бўлиб, чувиллашиб, бир-бирига қор отишган, бир-бирининг тўрвасини улоқ қилган. Бир жойда қизлар бир болани чалиб, тўрваси билан ағанатган. Тонг отгунча шу зайлда тўполон қилиб чиқадиган кўринадилар улар. Тун ҳам уларга бўлишгандек изғиринсиз, ойнинг нури қордан яна равшан тортгандек эди.

Темирчи галалашиб юрган қизлар орасида Оксана-нинг жарангдор товушини эшигандай бўлиб, қопларини кўтарганича тўхтади. Пайлари титраб, орқасидаги қопларни ерга ташлаб юборган эди, қопнинг тагида ўтирган мунши оғриқданвой-войлаб юборди, даъвошининг ҳиқиҷоғи тутиб, овозининг борича ҳиқиллаб юборди. Темирчи елкасидаги енгил қопи билан Оксананинг овози келган қизлар тўпи кетидан галалашиб бораётган йигитларга қўшилиб кетаверди.

«Шаҳло кўзи ўтдек ёниб маликага ўхшаб турган ул экан! Барно бир йигит унга бир нарсалар сўзлаяпти. Қизиқ гап айтаётган бўлса керак, қиз кулиб турибди. Аммо у доим кулгани-кулган-ку!» Темирчи ўзи ҳам билмай,

бейхиtiёр бирдан ҳаммани оралаб ўтиб, унинг қошига бориб турди.

Вакулани жинни қилғудай бўлган бояги масхараомуз кулги билан: «Э Вакула, шу ердамисан! Салом! Хўш! Рамазон айтиб нима йиғдинг? Қопинг мунча кичкина! Маликанинг оёғидаги кавушни келтирдингми, келтирсанг сенга тегаман!» деди шўх қиз ва кулганича қизларга қўшилиб қочиб кетди.

Темирчи қоққан қозиқдай қадалиб туриб қолди. «Йўқ, энди тоқатим қолмади...» деди чидолмай. «Э, худойим, нега мунча чиройлиг-а, қурғур. Қарashi, сўзи, ҳар бир қилиғи ўртандиради-я! Ўртандиради. Ҳеч тоқатим қолмади! Энди бирёғлиқ қилмасам бўлмайди. Улиб кетганим яхши, музни ёриб сувга чўкаман, номим ўчсин!»

Кейин дадил бўлиб, илдам-илдам юриб, қизлар тўпига етиб олди. Сўнгра Оксанага яқинлашиб, қатъий оҳангда «хайр, Оксана! Энди кўнглингга ёққан бошқасини топ, бошқа кимни хоҳласанг аҳмоқ қилавер, лекин мени бу дунёда энди кўролмайсан!» деди.

Барно қиз таажжублангандай ҳайрон бўлиб қолди, бир сўз айтмоқчи бўлди, лекин темирчи қўлини силтаб, чопганича кетиб қолди.

Унинг чопиб кетаётганини кўрган болалар, «Вакула, қаёққа!» деб орқасидан қичқириб қолдилар.

Темирчи уларга: «Хуш қолинглар, оғайнилар! Худо хоҳласа нариги дунёда кўришамиз, аммо бу дунёда энди бирга ўйнамоқ насиб бўлмас. Хайр, ёмон ишларимни эсламанглар! Кондрат отамизга айтинг, гуноҳкор арвоҳимга дуои-фотиҳа қилсин, дунёнинг ишлари билан овора бўлиб, азиз-авлиёларга сифинмадим, шам ёқмадим. Сандинимда нимаики бисот бўлса черковга худойи қилдим! Алвидо!» деб жавоб қайтарди.

Темирчи шундай деб, орқасида қопи билан яна чо-
пид кетаверди.

Йигитлар орқасидан:

— Ақлдан озибди шекиллик, — деб қолавердилар.

Кўчадан ўтиб бораётган художўй кампир:

— Худо урибди, темирчи ўзини қандай осганини бо-
риб ҳаммага айтай! — деб ўзича фўлдираб кетди.

Вакула бир неча кўчадан югуриб ўтиб, дам олгани тўхтади. «Ҳаммаси барбод бўлгандек қаёққа чопиб ке-
таётиман ўзим, — деб ўйлади у, — излай, запорожъели Мечкай. Пацюкка бориб маслаҳат қилиб кўрай, уни, жа-
ми жинлар билан таниш, ҳар қандай мушкулни осон қиласмиш, дейдилар-ку! Майли, бориб кўрай, бари бир ўлим кишисиман!» Қопда ҳалигача қимирамасдан жим ётган шайтон бу гапни эшитиб суюнганидан қоп ичидагийнай бошлади. Аммо темирчи қопга ўзим тегиб қимири-
латиб юбордим шекилли деб, қопни бир муштлаб, сил-
китди-да, Мечкай Пацюкниги қараб кетди.

Пацюк Мечкай бир замонлар запорожье казаклари-
дан бўлганлиги тўғри. Аммо уёқдан ҳайдалганми ёки ўзи
қочиб келганми, буни ҳеч ким билмас эди. Диканъка
қишлоғига келиб туриб қолганига аллақанча, ўн йил-
ми, балки ўн беш йилми бўлган. Аввал худди запорожье-
ликнинг ўзи эди, ҳеч ишламас, куннинг уч қисмини уйқу
билан ўтқазар, олти ўроқчининг овқатини ер, бир кў-
тарганда салкам бир челяк арақ ичар эди. Бунча овқат-
нинг жойлашадиган ўрни ҳам бор эди, чунки бўйи паст-
роқ бўлса ҳам, энига хийла катта эди. Кийган чоловори-
нинг кенглиги шунчалик эдики, ҳар қанча катта қадам
ташласа ҳам, оёғи сира кўринмас, юрганда вино со-
линадиган бочка юриб кетаётганга ўхшарди. Шу туфай-
ли Мечкай лақабини олган бўлса ҳам ажаб эмас. Қишлоққа келганига уч-тўрт кун бўлар-бўлмас фолбинли-
ги ҳаммага машҳур бўлди. Бирор бетоб бўлса, дарров

уни чақирипар эди; келиб шивирлаб бир дуо ўқиса, ҳар қандай дард тузалиб кетар эди. Нафси бузуқ зодагонлардан биронтасига балиқнинг қилтаноғи тиқилиб қолса, Пацюк боплаб бир мушт урганда қилтаноқ зодагоннинг томоғига ҳеч зиён-заҳмат етказмасдан жойини топиб кетарди. Лекин сўнгги вақтларда у кам қўрина-диган бўлиб қолган эди. Бунинг сабаби дангасалиги бўлса ҳам ажаб эмас, аммо йилдан-йилга эшикка сифмайдиган бўлиб бораётганлигидан бўлса ҳам эҳтимол. Унинг ўзи эшикка чиқмасди-ю, жамоа аҳлларидан кимнинг унга иши тушиб қолса, ўзи борар эди.

Темирчи қўрқа-писа эшикни очиб қараса, Пацюк чордана қуриб ўтирибди, олдида кичкина бочкача, бочкача устида товоқда туппа оши; товоқни атайин оғзига тўғрилаб баланд қилиб қўйибди. Қўлинин асло қимиirlатмасдан, бошини андак энгаштириб товоқдан ҳўплаб ичар, гоҳда туппани тиши билан тишлаб олар эди.

Вакула буни кўриб, «буниси Чубдан ҳам баттар ялқов экан. Чуб-ку, овқатини қошиқ билан ейди-я, бу қўлини кўтаргиси ҳам келмайди!» — деб қўйди ичидা.

Пацюк туппа оши билан өвора бўлса керак, остоんだн ўтар-ўтмае энгashiб салом берган темирчининг келганини пайқамади.

Вакула яна салом бериб:

— Ҳузурингга илтимос билан келдим! — деди.

Хўппасемиз Пацюк бошини кўтариб қараб қўйди-да, яна туппасини ичаверди.

Темирчи нафасини ростлаб олиб:

— Аччиғинг чиқмасин, мен бу гапни сени ранжитмоқ учун айтаётганим йўқ, сенинг шайтон билан озроқ қариндошчилигинг бормиш, — деди.

Вакула бу сўзларни айтиб қўйиб, кейин қалтис сўзларни бир оз юмшатмасдан, қўполроқ қилиб гапирдими, деб қўрқди ва Пацюк товоғи билан бошимга уриб

қолармикан, деган хавотирда ўзини бир чеккага олиб, тупланинг иссиқ шўрваси бетимга сачрамасин, деб енги билан бетини бекитиб олди.

Аммо Пацюк бир қараб қўйиб, туппасини еяверди. Темирчи сал ботирланиб, яна:

— Пацюк, худо ҳеч нарсадан кам қилмасин, давлатинг зиёда бўлсин, нону тузингга барака берсин, мен сенга паноҳ тортиб келдим! — деди. Темирчи гоҳда суҳандонлик ҳам қилиб қўяр эди, чунки юзбошининг тахта деворини бўягани Полтавага борганда анча пишиб қолган эди. — Мен гуноҳга ботган бечораман, дардимга даво йўқ. Энди нима бўлса бўлди, шайтонга ялинишдан бўлак чора қолмади. Нима қилай, Пацюк? — Пацюк индамасдан ўтиравергач. — Қандай қилай? — деди яна.

Пацюк бошини кўтармай туппасини ошаларкан:

— Шайтон керак бўлса, бор ўшанинг олдига,— деди. Темирчи энгашиб салом бериб:

— Шунинг учун сенинг қошимингга келдим-да, шайтонга элтар йўлни сендан бошқа ҳеч ким билмаса керак, — деди.

Пацюк чурқ этмай, қолган туппасини еб бўлди. Темирчи уни ўз ҳолига қўймай:

— Раҳм қилгин, яхши одам, йўқ дема: чўчқа гўшти дейсанми, колбасами, оқ ун, қора ун дейсанми, матоми, сўкми, нимаики керак бўлса берай, яхшиликка яхшилик қайтараман, менда қолмас... лоақал шайтонга элтадиган йўлни кўрсатиб қўй,— дерди.

Пацюк бояги-боягича бемалол ва бепарво:

— Шайтон елкасида турган одам шайтонни қидирмайди, — деди.

Бу сўзларнинг маъноси Пацюкнинг манглайида ёзилгандек, Вакула унга тикилиб қолди. Унинг кўринишидан, нима деяпти, деган савол ёғиларди. Сал очилиб

қолган оғзи. Пацюк айтган ҳар бир сўзни худди туппадек ютиб юборгудай бўлиб туарди. Лекин Пацюк индамасди.

Вакула яхшироқ қараса, Пацюкнинг олдида на бочка идиш бор, на товоқда туппа. Лекин ерда иккита заранг коса турибди, бирида чучвара, бирида қаймоқ. Унинг хаёли, кўзи беихтиёр бу овқатга қаратилди. Узига-ўзи «кўрай-чи: чучварани қандай еркан, туппани еган-дек бошини эгиси келмас, эгганда ҳам, бари бир бўлмайди, чунки чучварани қаймоққа ботириб олиш керак-ку», деб ўйлади.

Вакула шундай деб ўйлаши биланоқ Пацюк оғзини очди, чучварага бир қараб қўйиб оғзини яна каттароқ очди. Чучвара косадан сакраб чиқиб қаймоққа тушди, унда бир думалаб, сапчиб Пацюкнинг оғзига кириб кетди. Еб бўлгач, яна оғзини очди, чучвара яна шу хилда сапчиб, оғзига кириб кетди. Унинг иши фақат чайнашу ютиш эди.

Темирчи таажжубдан афрайиб, «галати-ку!» деб ҳайрон бўлиб туриб эди, чучвара унинг оғзига ҳам кириб кетаётганини фаҳмлаб қолди. Лаби аллақачон қаймоқ бўлибди. Темирчи чучварани ютиб, лабини артиб дунёда қандай ғалати ажойиботлар бўлади-я, шайтон одамини қандай ишларга бошлайди-я, деб ўйлаб қолди ва Пацюқдан бошқа ҳеч ким унга ёрдам беролмаслигини билди. «Яна бир салом бериб кўрай, уқдириброқ айтсин... И-е, менга нима бало бўлди, бугун ўта рўза тутадиган кун эди-ку! Чучвара еб қўйдим, чучвара тузлик-ку! Қандай аҳмоқман, қараб туриб гуноҳкор бўлдим-а! Қоч энди!» Художўй темирчи орқасига қарамай юурганча уйдан қочиб чиқди.

Аммо унинг қопида суюниб ўтирган шайтон, ғаними ни қўлдан чиқаргуси келмади. Темирчи қопни ерга қў-

Йиши билан шайтон дарров чиқиб, унинг елкасига ми-
ниб олди.

Темирчининг бадани жимиirlаб кетди. Қути учиб, қо-
ни қочиб, чўқинмоқчи бўлиб турганида шайтон тумшу-
ғини унинг ўнг қулогига яқин келтириб:

— Мен сенга дўстман, дўстим, биродарим учун ҳар
нарса қиласман,— кейин чап қулогига чийиллаб:— Пул
десанг истаганингча бераман,— деди. Кейин тумшуғини
яна ўнг қулогига тутиб:— Оксана шу бугуннинг ўзида
бизники бўлади,— деб шивирлади. Темирчи ўйлаб ту-
риб:

— Хўп, бу баҳо учун мен сеникиман! — деди.

Шайтон қарсак уриб, хурсандлигидан темирчининг
елкасида туриб ўйин тушиб кетди. Энди қўлимга туш-
ди-ю, шайтонларни масхара қилиб солган суратлари-
нинг аламини энди оламан, қишлоқнинг энг яхши ху-
дожўй одами қўлимга тушганини шерикларим билса-
лар, нима деркинлар, дерди ўзича. Дўзахдаги қуйруқ-
лиларни қандай мазах қилишини, уларнинг васвасачи-
ликда энг биринчиси бўлган чўлоқ шайтонга қандай
алам қилишини кўз олдига келтириб кулиб юборди.

Шайтон, темирчи қочиб кетмасин, деган хавотирда
бўлганидан ҳали ҳам унинг елкасидан тушмай чийиллаб:

— Лекин, Вакулка, ўртада бир шарт боғламасдан
ҳеч бир иш қилинмаслигини ўзинг биласан! — деди.

— Нима десанг мен тайёрман,— деди темирчи.—
Сизларда қон билан қўл қўйиш одатмиш деб эшигдим;
тўхта, киссамдаги михимни олай! — деб қўлини орқаси-
га қилиб, шайтонни думидан тутиб олди.

Шайтон кулганча:

— И-е, ҳазилкаш экансан-ку! Қўй ҳазилингни, бас! —
деди бақириб.

— Шошма, жонгинам! Манавинга қараб қўй-чи, ни-

ма? — деб, дарров чўқинганди, шайтон бирпасда му-
лойим бўлиб, қўзичноқдек юввош тортиб қолди. Қейин
думидан тортиб елкасидан тушираркан,— тўхта-чи, ях-
ши одамларни йўлдан оздирадиган, гуноҳга бошлайди-
ган санми, шошмай тур! — деб унинг устига миниб ол-
ди, кейин чўқинмоқчи бўлиб қўлини кўтарган эди:

— Вакула, афв эт! Нима буюрсанг бажо келтира-
ман, жонимни қийнама, тавба қилдим, чўқинтирма ме-
ни, хочингдан қўрқаман! — деб ялинди.

— Ҳа-ҳа! Энди бошқача тилинг чиқдими, лаънати
немис! Нима қилишимни энди ўзим биламан. Ҳозир ме-
ни учириб обор, қушдек уч!

Шайтон ғамгин қиёфада: «Қаёққа?..» деди.

— Петембургга! Тўппа-тўғри пошшо хотин олдига
обор!

Ҳавога кўтарилиб учиши билан, темирчи қўрққани-
дан юраги орқасига тортиб кетди.



Оксана темирчининг ғалати гапларини ўйлаб, хаёл
сурив қолди. Темирчига ҳаддан ташқари жабр қилгани-
ни ўзи ҳам билиб, ичиде афсус ер эди. «Агар ростдан
ҳам ёмон бир иш қилиб қўйса нима бўлади? Аламидан
ҳар нарса қилса қилаверади-да! Бошқа бирорни яхши
кўриб, ўшани қишлоқнинг барноси деб мақтаб юрса
ҳам юраверади-да. Йўқ, мени севади, мендан чиройли-
ги борми! Мендан асло ажралмайди, ҳазиллашиб қўй-
ди-да! Ўн минут ҳам ўтмасдан мени кўргани яна қайтиб
келади. Нафсамбри, унга бараҳмлик қилдим. Хоҳлама-
гандек бўлса ҳам бир ўпич берай. Бир суюнтирай!» Ен-
гилтак гўзал қиз ўртоқлари билан ҳазиллашиб ўйнаб
кетди. Ўртоқларидан бири:

— Шошманглар, темирчи қопларини эсидан чиқазиб ташлаб кетибди. Қаранглар, ғалати қоплар-а. У рама-зонни биздақа айтмабди, унга бир нимтадан гўшт бер-ганга ўхшайдилар, колбаса билан нон беҳисобдир. Мўл-чилик, ҳайт ўтгунча маза қилсан бўлади,— деди.

— Темирчининг қопларими ҳали бу? — деди Оксана ҳам. — Тез бўлинглар, бизникига обориб, яхшилаб қа-райлик-чи, нималари бор экан.

Қизларнинг ҳаммаси кулишиб, унинг гапини маъ-кулладилар.

Қизлар қопларни кўтариб кўриб:

— Вой, бизлар кўтаролмаймиз, — деб чувиллашди-лар.

— Шошманглар, дарров бориб чана келтириб, чанага ортиб олиб кетамиз,— деди Оксана.

Қизлар чанага югуриб кетдилар.

Мунши бармоғи билан қопни анчагина тешиб қўй-ган бўлса ҳам, ҳар ҳолда қопга тушганлар жуда зерикиб қолишди. Агар одам бўлмагандан, мунши бир илож қилиб чиқиб оларди, аммо ҳамма қараб тургандা қопдан чиқиб, ўзини-ўзи майна қилсинми... Бу мулоҳа-за уни сабр қилишга мажбур этди, шунинг учун, Чуб-нинг этиги анча эзганига қарамай, инқиллаб, сабр қи-лишга қарор берди. Чуб ҳам тагидаги нарса ўтиришга ноқулай, бесёнақай эканини сезиб, у ҳам тезроқ қутила қолишни хоҳлар эди. Аммо қизининг бояги сўзини эши-тиши билан хотиржам бўлди. Уйга етгунча юз қадам, балки кўпроқ юрмоқ керак. Қопдан чиқадиган бўлса ўёқ-буёгини ростлаб, пўстинининг боғичини тақмоғи, камарини боғламоғи керак, бунинг устига тумоғи ҳам Солоҳаникода қолибди; шу мулоҳаза билан, чиқмай ўти-раверди. Қизлар чанада элтиб қўйсалар яхши эмасми, Аммо Чуб ўйлагандай бўлмади. Қизлар чанага кетган-ларида, анави новча, қотма оғайниси жуда хафа бўлиб

арақхонадан чиқиб келди. Арақфуруш хотин насияга бермабди. Биронта худо ярлақаган бадавлат келиб қолиб ичиармикин деган умидда хийла кутди, лекин асига олгандай, давлатманд боёнларнинг бариси художўй христиан бўлганларидан, уйларида бола-чақалари билан бирга бўтқа ош еб ўтирадилар. У, одамларнинг феъли кетганлиги, арақфуруш жуҳуд хотиннинг тошбағирлиги тўғрисида ўйлаб бораётиб, қопларни кўриб, ҳайрон бўлиб тўхтаб қолди. Уён-буёнга аланглаб қараб:

— Ким йўлга қопини ташлаб кетибди! Гўшт-пўшти бордир! Битта-яримта баҳти очилган рамазон айтиб йиқкану шунча нарсани! Мунча баҳайбат қоплар-а! Агар ясмиқ унидан бўлса ҳам, буғдой унидан бўлса ҳам, ичи тўла нон бўлса ҳам ёмон эмас. Нуқул чапати патир бўлса тағин яхши. У ҳам ширин бўлади. Арақфуруш жуҳуд хотин битта патирга нимчорак арақ беради. Бирор кўриб қолмасдан тезроқ олиб кетай! — Чуб билан мунши тушган қопни орқалаб олмоқчи бўлди, лекин қараса, жуда оғир. — Бир кишига оғирлик қиласкан. Хайрият, бўзчи Шапувалёнко келяпти. Ассалому алайкум, Остап!

Бўзчи ҳам тўхтаб, салом берди.

— Ийл бўлсин?

— Үзим. Оёғим қаёққа тортса шу ёққа кетаётубман.

— Яхши киши, шу қопларни кўтаришвор. Бирор рамазон айтиб йифиб-йифиб, кўчага ташлаб кетибди. Нима бўлса бўлишиб оламиз!..

— Қоп? Нимаси бор экан, патирми, кулчами?

— Нима десанг борга ўхшайди.

Дарров четан девордан иккита калтак суғуриб, қопни калтакка қўйиб елкалаб кўтариб кетдилар.

Бора туриб, бўзчи:

— Қаёққа оборамиз, арақхонагами? — деди.

— Мен ҳам ўшатга борайлик деган эдим-у, лекин

бадбаҳт жуҳуд хотин ишонмасдан, биронникини ўғирлаб келишди, деб ўйлармикин дейман, ундан ташқари, мен ҳозиргина у ердан чиқдим. Бизниги оборамиз, ҳеч ким йўқ, бемалол, хотиним уйда эмас.

Бўзчи, эҳтиёткорлик қилиб:

— Йўқлиги аниқми? — деди.

— Худога шукур, ақлимизни еб қўйганимиз йўқ, агар уйда бўлса жинни бўпманми бориб. Тонг отгунча хотинлар билан валақлашса керак,— деди.

Икки дўстнинг даҳлиздаги ғовур-ғувуруни эшишиб қолган хотини эшикни очиб, «кимсан?» деди.

Эри хотинининг уйдалигини билиб тахта бўлиб қолди.

Бўзчининг ҳам қўллари шалвиллаб, «ана холос!» деди.

Унинг хотини шундай қимматбаҳо ҳазина эдики, бундай матодан дунёда оз эмас. Эри сингари у ҳам сира уйда ўтирас, эртадан-кечгача қўни-қўшниларникида, бадавлат кампирларникида юриб, овқатларини мақтаб-мақтаб, иштаҳа билан ер эди, эри билан фақат эрталаб уришарди, чунки гоҳ-гоҳда фақат эрталаб кўрмаса, бўлак вақтда уни сира кўрмас эди. Уйлари қишлоқ миrzасининг чолваридан икки ҳисса эскироқ, томларининг похоли тушиб кетиб, уер-буери очилиб қолган эди. Гаврондан тўқилган четан девор аллақачон бузилиб, титилиб кетган, чунки ўтган-кетганлардан кимга ит ургани калтак керак бўлса, фалончининг девори бор-ку, деб уйдан калтак олмай, унинг деворидан суғуриб кетарди. Печкаси уч кунда бир ёқилар эди. Хотини сахийлардан нимаики тама қилиб сўраб олса, эридан яшириб, бурчак бурчакка тиқар ва лекин эри топганини дарров арақ-хонада йўқотиб келмаса, зўрлик қилиб қўлидан тортибиблар эди. Эри шунча вазминлиги билан ҳам хотинидан паст келишни хоҳламас ва аксари икки қовоғи кўкариб,

үйдан чиқиб кетар, қадрдон заифаси эса оҳ-воҳ қилиб, эрининг зулмидан, еган калтакларидан қўшни кампирларга ҳасрат қилгани жўнарди.

Бўэчи билан оғайнисининг қандай саросимага тушиб қолганларини ўзингиз тушунаверинг. Қопни ерга қўйиб, иккови этаклари билан тўсиб олдилар. Бироқ, фурсат ўтди, чунки кампир гарчи кўзи хирароқ бўлса ҳам, қопга аллақачон кўзи тушган эди.

— Мана бу ишинг яхши! — деди хотин. Унинг авзойи жўжага кўзи тушган калхатга ўхшарди. — Рамазон айтиб шунча овқат йиғдингизми, яхши одам ҳаммавақт шунаقا бўлади, бироқ ўт-бетдан уриб келганмисизлар, деб ўйлайман. Қани, ҳозир менга кўрсатинг қопингизни, тез кўрсатинг дейман!

Эри керилиб туриб:

— Бошида бир туки қолмаган кал шайтон кўрсатмаса, биз кўрсатмаймиз, — деди.

— Бу нарсаларни рамазон айтиб топган биз, сени ишинг нима? — деди бўзчи.

Хотини новча эрининг иягига бир мушт уриб:

— Кўрсатмайсанми ҳали,вой яшамагур банги! — деб қопга човут солди.

Аммо эри билан бўзчи мардлик кўрсатиб, қопни бермасдан, уни чекинишга мажбур қилдилар. Лекин улар ўзларига келгунча бўлмай, кампир қўлида темир косов билан даҳлиздан югуриб чиқди ва кела солиб, эрининг қўлига, бўзчининг елкасига тушириб, қопнинг тепасига келиб, ўзиники қилиб олди.

— Нега уни қоп яқинига йўлатдинг? — деди бўзчи ҳушига келиб.

— И-е, мен йўлатдимми, нега сен йўлатдинг, ахир! — деди униси шалвайиб.

— Косовингиз темирга ўхшайди-я, — деди бўзчи бирпас жим тургандан кейин елкасини қаширкан. — Ўт-

ган йил ярмарка бўлганда хотиним тангамирига бир косов олган экан, ёмон эмас... унча оғритмайди...

Зўр чиққан хотини қўлидаги қора чироқни ерга қўйиб, қопни ечиб қаради. Аммо қопни дарров кўрган хирада кўзлари энди алданди.

— Эҳ-ҳа, бутун бошли тўнғиз-ку! — деди у суюнганидан чапак чалиб.

— Эшитдингми, бутун бошли тўнғиз экан! Қилдинг-қилдинг, сен қилдинг! — деди бўзчи шеригини туртиб.

— Нима ҳам қила олардик, — деди шериги.

— Бу нима деганинг? Нега қараб турибмиз? Қўлидан тортиб олайлик қопни, қани, бошла сен!

— Нари тур, нари тур, сенинг ҳаққинг йўқ тўнғизда, бизники! — деди бўзчи яқин келиб.

— Нари тур, шайтоннинг хотини! Нима ҳаққинг борсени, — деди эри ҳам хотинига яқинроқ келиб.

Хотини яна темир косовга қўйл узатган эди, шу пайт Чуб қопдан чиқиб, узоқ уйқудан турган кишидек даҳлизинг ўртасида кериша бошлади.

Кампир икки қўлинни сонига уриб, қичқириб юборди, ҳаммасининг оғзи очилиб, ҳайрон бўлиб қолишиди.

— Нодон бўлмаса нега тўнғиз, дейди. Бу тўнғиз эмас! — деди эри кўзини ола-кула қилиб.

— Шундоқ одамни ҳам қопга тиқадими! Нима дессангам, шайтоннинг иши, бошқа эмас, бўлмаса қандай қилиб дарчага сиғади! — деди, қўрқиб кетган бўзчи ўзи ни орқага ташлаб. Униси бўлса, тикилиброқ қараганидан кейин: «э, оғайним-ку!» деб қичқириб юборди.

— Бўлмаса ким деб ўйлаб эдинг? — деди Чуб ил, жайиб. — Хўп майна қилдимми икковингни? Чўчқа, деб мени емоқчи эдингиз-а! Шошманглар, қонда яна бир нарса бор, тўнғиз бўлмаса ҳам, боласи тагимда ётиб фивир-фивир қилганди, — деди.



Бўзчи билан йўлдоши бирдан қопга ёпишди, хотин ҳам бирёқдан ёпишди. Қопдан чиқишдан бошқа чора йўқлигини билган мунши эмаклаб чиқмагандар, улар ўртасида яна талаш бошланар эди.

Хотиннинг ўтакаси ёрилгудай бўлиб, муншининг оёғидан ушлаб тортаётган жойида қўйиб юборди.

— Яна биттаси чиқди! — деб бақириб юборди бўзчи қўрққанидан.— Нима бало бўлди... Бошим айланиб қолди... Энди рамазон айтганларнинг қопига колбаса-ю, кулча ўрнига одам ташлайдиган бўлибдилар!

Ҳаммадан баттар таажжубда қолган Чуб, «Муншику!» деди.

— Баракалла, Солоха! Қопга хўп тиққан экан... Нега уйи тўла қоп дедим-а... Энди билсам ҳар қопда иккитадан одам бор экан, ёлғиз мен билан... деб ўйлаган әдим, баракалла, Солоха.



Қизлар қопнинг биттасини тополмай, ҳайрон бўлдилар. «Майли, шу биттаси ҳам бўлади», деди Оксана.

Ҳаммалари қопга ёпишиб чанага ортдилар.

Даъвоши қоп ичидаги ўтириб ўйлади: «Агар қопни ечиб, мени чиқаринглар деб қичқиргундай бўлсан, нодон қизлар, қопдаги шайтон экан, деб қочиб кетишади, эртагача кўчада қолиб кетаман, шунинг учун индамай жим ўтираверганим маъқул».

Қизлар бўлса қўл ушлашиб, гарчиллама қорда чанани учирганча олиб кетдилар. Баъзилари шўхлик қилиб чанага ўтириб олдилар, даъвошининг тепасига миниб олувчилар ҳам бўлди. Даъвоши чурқ этмасдан бардош беришга қарор қилди. Алоҳа етиб келдилар, даҳлиз ва уйнинг эшигини ланг очиб, хахолашганча қопни судраб

кирдилар. Қизларнинг бариси қопни ечмоққа уриниб, «Нима бор экан, нима экан», деб чувиллашар эди.

Шу пайт, даъвошини боядан бери жуда қийнаб кела-ётган ҳиқичноқ билан йўтал шундай тутиб бердики, асло тўхтатолмасдан овозининг борича йўталиб юборди. Қизлар қўрқишиб, «одам ётибди», деб чинқиришганларича ташқарига қочиб кетдилар.

Чуб эшикдан кириб келаркан:

— Нима бало бўлди сизларга, жинни бўлдингларми? — деди.

— Вой, дада, қопда одам бор экан! — деди Оксана

— Қопда? Бу қопни қаердан олдинглар?

Ҳаммалари бирданига:

— Темирчи кўчага ташлаб кетди, — дейишиди.

«Ана, ҳали айтмадимми», деб қўйди ичида Чуб.

— Нимага қўрқасизлар? Қани, қарайлик-чи. Ҳой одам, исмингни билмаймиз, хафа бўлмайсан, қани, чиқ қопдан!

Қопдан даъвоши чиқди.

Қизлар «вой ўлай!» деб чинқириб юборишиди.

Чуб, даъвошининг бошидан оёғигача қараб, ичида: «Даъвоши ҳам шу йўлга кирган экан-да», деб ҳайрон бўлиб, «ана холос!.. Оббо!» деганича қолди.

Даъвоши ҳам Чубдан баттар хижолат бўлиб, нима дейишини билмас эди. Қейин бирпас туриб:

— Ташқарида ҳаво совуқми? — деб сўради Чубдан.

— Бир оз совуқ, — деб жавоб берди Чуб. — Сўрасам майлими, этигингга қора мой суртасанми, думба мойими?

Унинг муддаоси бошқа эди, нима бўлиб қопга тушдинг, деб сўрамоқчи эди, аммо нега бундай деганини ўзи ҳам билмай қолди.

— Қора мой суртган яхшироқ, — деди даъвоши, —

Чуб, хайр! — деб, тумофини босдириб олиб уйдан чиқиб кетди.

Чуб, даъвоши чиқиб кетган эшикка қараб туриб;

— Этигини нима билан мойлашини нега сўрадим! — деди ўзича.— Баракалла, Солоха! Шундай одамни қопга тиққанингга қойилман!, Оббо шайтон хотин-э! Офарин-э! Мен аҳмоқ бўлсам... қани ҳалиги лаънати қоп?

— Анави бурчакка элтиб қўйдим. Ичида бошқа ҳеч нарса йўқ! — деди Оксана.

— Бекор айтибсан, ҳеч нарса йўғ-а! Қани, буёққа келтир. Яна бирор бўлса керак! Яхшилаб қоқинглар... Хўш, йўқми?. Ҳа, лаънати хотин! Кўриниши авлиёга ўхшайди, ўзини жуда покиза, покдоман тутади.

Лекин биз Чубни шу аччиқ ва алам устида қолдириб, энди темирчига келайлик, чунки соат тўққиз бўлай деб қолди шекилли.

Вакула осмонда жуда баландга чиқиб қетганидан ерга қараса ҳеч нарса кўринмайди; юрагига ваҳима тушди. Пашшадек бўлиб ойнинг таггинасидан ўтиб кетди; агар бошини эгмаганида қалпоги ойга илиниб қоллар эди. Аммо бир оздан кейин сал ботирланиб, шайтон билан ҳазиллаша бошлади. Санобар ёғочдан қилинган хочни бўйнидан олиб унинг яқинига келтирса, шайтон аксириб, йўтали тутар эди. Жўрттага бошини қашимоқчи бўлиб қўлинни кўтарса ҳам, шайтон чўқинтирмоқчи шекилли, деб яна баландроқ учар эди. Осмон чарақлаб, ҳаммаёқ ёруғ ва равшан эди. Кумушдек туман ичида ҳаво тиниқ, ҳамма нарса равшан кўринар эди. Ҳатто тувак ичига тушиб олиб, шамолдек учиб ўтиб кетган сеҳргарни ҳам кўрди; юлдузларнинг тўп бўлиб, кўз боғлаш ўйнаётганларини, бир томонда аллақанча арвоҳлар ғужгуж бўлиб пириллашиб учиб юрганини ҳам кўрди; ойнинг олдида дингиллаб ўйнаб турган шайтон учиб кетаётган темирчини кўриб, шапкасини олиб салом бергани-

ни, ялмоғиз кампирни бирон ерга әлтиб ташлаб, энди ўзи салт қайтиб келаётган супургини... хуллас яна бир талай бўлмағур нарсаларни кўрди. Нимаики йўлда учраса, бирпасда тўхтаб, тақачини томоша қилиб, кейин яна йўлга тушар эди. Темирчи учиб-учиб Петербургга етди. Шу куни шаҳар, билмадим нима учун, чароғон экан. Шайтон йўлдаги говдан ўтга, ерга тушиб арғу-моқ отга айланди; темирчи қараса, шўх, чопағон от устида кўчада кетяпти. Ёнирай! Тасур-тусур, тўпалон, дабдабаси оламни бузгундай. Кўчанинг икки томонида тўрт қаватли иморатлар. Отларнинг тасур-тусури, филди-ракларнинг ғози тўрт томондан акс-садо берар эди. Уйлар тобора кўпайиб, худди ердан ўсиб чиқаётгандай кўринарди. Кўприклар лопиллайди, файтон аравалар гумбўрлайди, извошчилар, кучерлар пўшт-пўштлаб қичқиришади. Ҳар тарафдан чопиб кетаётган минг-минг чаналар қорни тўзитиб, учирив ўтарди, пиёдалар қатор-қатор шамдон осилган деворлар тагига сиқилиб борур эдилар, уларнинг узун-узун тарнов бўйи соялари томга етар эди. Темирчи ҳар тарафга аланглар эди. Назарида жами уйлар чироғли кўзларини унга тикиб тургандек эди. Мовут пўстин кийган бойлар кўплигидан қайси бирига салом беришини билмай қолди. «Ёнирай! Бойлар мунча кўп экан бунда! — дерди ичида.— Пўстин кийганларнинг бариси суд аъзоси бўлса керак! Ойнавон араваларда ўтганлар шаҳар бошлиғи бўлмаса, ҳокимдир ёки ундан ҳам улуғдир». Шу пайт шайтон: «Тўппа-тўғри ма-ликаникига бораверамизми?» — деб сўраб қолди. Темирчи ичида: «Йўғ-э, ваҳималик-ку! — деб қўйди.— Ўтган йил кузда Диканъқадан ўтиб кетган запорожъеликлар шу ўртада бир жойга тушгандирлар. Юртларидан пошшога хат олиб келган эдилар; шулар билан маслаҳатлашсам яхши бўларди. Ҳой, шайтон, дарров чўнтағимга кир, мени запорожъелилар олдига олиб бор!» — деб

ди. Шайтон бир лаҳзада озиб, жинғарча бўлиб қолди ва бемалол унинг чўнтағига тушиб олди. Вакула ҳаш-паш дегунча улкан бир уйга етиб келди. Таваккал қилиб, ичкари кирди, зинадан чиқиб, эшикни очар-очмас, уйнинг дабдабасини кўриб ваҳимаси келиб, кетига тисланди. Лекин Диканъкадан келган запорожъелилар қора мой суртилган этиклари билан шоҳи диванларда чордона қуриб, асил тамакилардан чекиб ўтирганларини кўриб юраги дадилроқ бўлди.

— Ассалому алайкум, улуғлар, худо ёр бўлсин, шундай жойда кўришдик! — деди темирчи пешанаси ерга теккунча энгашиб салом бериб.

Темирчининг худди олдигинасида ўтирган, ёнидагидан сўради:

— Ким у келган?

— Ҳали танимадингларми мени, темирчи Вакула бўламан! Кузда Диканъкадан ўтганингизда, худо саломат қилсин, умрингиз узоқ бўлсин, омон бўлинглар, салкам икки кун қўнган эдингиз. Аравангизнинг олдинги фиддирагига темир қоқиб берган эдим,— деди.

— Ҳа, анави сурат солишга уста темирчими? Омонмисан, ҳамشاҳар, худойим нега сени бу томонларга келтирди? — деди боягиси.

— Ўзим томоша қилгим келди, дейдиларки...

Запорожъели ўзига оро бериб ва русча гаплашишни билганини кўрсатмоқчи бўлиб:

— Хўш, ҳамشاҳар, шаҳар катта эканми? — деди.

Темирчи шарманда бўлишни хоҳламади, шаҳарни энди кўрганини ҳам билдиргиси келмади. Бундан ташқари, ўзи ҳам сўзга чечан, саводи чиққан мулла эди, шунинг учун бамайлихотир:

— Донғи кетган музофот! Нимасини айтасиз, уйлар улкан, ҳаммасига басавлат суратлар осиглиқ, кўп уйлар-

га зар билан битилган. Нимасини айтай, бафоят бежирим ва келишганки! — деди.

Запорожъеликлар темирчининг гапга бундай чечанигини кўриб, унга ҳурматлари ошди.

— Ҳамشاҳар, сен билан кейин бафуржа сўзлашамиз, ҳозир бизлар пошшо хонимнинг ҳузурига кетаётибмиз.

— Пошшо хонимнинг ҳузуригами! Улуғлар, марҳамат кўрсатиб, мени ҳам өлиб боринглар!

Ростакам катта отга миндир, деб ялиниб турган тўрт яшар болага катта киши қандай муомала қилса, запорожъели ҳам унга шундай муомала қилиб:

— Сеними? У ерда сен нима қиласан, йўқ, бўлмайди! Биродар, бизларнинг пошшо билан гаплашадиган гапимиз бор,— деб гапини тутгатди.

Темирчи: «Бирга оборинг!» деб ялинди. Кейин киссасига бир мушт уриб, шайтонга «сўра сен ҳам» деди. Буни айтар-айтмас, улардан бири «оғалар, обора қолайлик!» деди.

— Бизларникига ўхшаган кийим кий.

Темирчи яшил чакмонни энди кияётган эди, эшик очилиб, олтин уقا тутган одам кириб, отланинглар, вақт бўлди, деди.

Рессорлик каттакон аравада тебраниб бораётганида, тўрт қаватли уйлар олдидан ўтаётганида, уйлар ва тош ўйл ўзи юриб кетаётгандек кўринганда темирчи яна тажжубда қолди.

«Худоё тавба, шунча ҳам ёруғ бўладими, бизнинг қишлоқда кундузи ҳам бундай ёруғ бўлмайди!» дерди ичидা.

Аравалар бир ажойиб сарой олдига келиб тўхтади. Ҳаммалари аравалардан тушиб, ҳашаматли бир хонага кирдилар, кейин кўзни қамаштиргудай ёруғ пиллапоядан юқорига чиқдилар.

Темирчи ўз-ўзига:

«Шунақа ҳам пиллапоя бўладими? Оёқ босгани кўзинг қиймайди. Ана зебу зийнат! Эртакларнинг бариси Ҷон дейдилар! Ҳеч ён эмас экан! Ёпирай, панжарага қаранглар, хўп ишлабди-да, битта темирнинг ўзидан эллик сўмлик кетган бўлса керак!» — дерди.

Запорожъелилар пиллапоядан чиқиб, энг олдиндаги катта хонага кирдилар. Темирчи паркет полда оёғи сирғаниб, улар кетидан зўрга-зўрга борар эди. Уч хонадан ўтдилар, лекин темирчи ҳали ҳам ҳайратда. Тўртинчи хонага киргандан беихтиёр, деворда осиғлиқ сурат тагига келди. Бу сурат қўлида Исо пайғамбарни кўтариб турган биби Марям эди. «Ажойиб сурат экан, хўп чиройли ясабди! Худди гапириб тургандек, тирикка ўхшайди-я! Азиз боласини қаранг, қўлларини сиқиб олибди, бола фақирнинг кулишини қаранг! Бўёқлари мунча ажойиб! Ё, бафармони худо, бўёғини қаранглар! Охра бўёқдан бир чақалик ҳам ишлатилмабди, нуқул локу ложивар. Тобланишини қаранг ложиварни! Ишига оғарин-а! Таг сирига нуқул асил оқдан берган бўлса керак.— Эшик олдига келиб, қулфини тутиб кўраркан,— ва лекин бу сурат ҳар қанча ғалати бўлса ҳам, манави жез қабза ундан ҳам аломат экан, хўп тоза ишлабди! Немис темирчилари жуда қимматбаҳога ясаб бергандирлар, деб ўйлайман...» Агар зар уқа таққан малай келиб қўлтиридан туртиб, кейинда қолманг, демаса, ҳали анчагача шу зайлда анқайиб тураверарди. Меҳмонлар яна икки хонадан ўтгач тўхтадилар. Шу ерда кутиб туриш буюрилган эди. Кийимига олтин тикилган бир неча генераллар тўдалашиб юрар эдилар. Запорожъедан келганлар энкайиб салом бергач, ҳаммалари бир ерга руж бўлиб турдилар. Бир лаҳзадан кейин хийлагина семиз, баланд бўйли, гетманча чакмон кийган, оёғида сариқ кўн этик, басавлат одам бирталай маҳрамлари



билин кириб келди. Сочлари тўзиган, бир кўзи сал фи-
лайроқ, улуғсифат ва салобатли, амр-фармон қилиб ўр-
ганиб қолгани ҳар бир ҳаракатидан кўриниб турибди.
Зарвароқ кийимларда керилиб, савлат билан турган ге-
нераллар дарров дабдабадан тушиб, ҳаммаси унинг оғ-
зидан бир сўз чиқар-чиқмас ёки сал имо қилгунча бўл-
май таъзим билан дарров югуриб, унинг амрини бажо
келтиришга ҳозир бўлиб, типирчилаб турар эдилар.
Аммо гетман уларни ҳеч писанд қилмай, боши билан
андак имо қилиб, запорожъелилар олдига келди. Запо-
рожъелиларнинг ҳаммалари оёғига бош уриб салом бер-
дилар.

Сал димоғида сўзлаб, салмоқ билан:

— Ҳаммангиз шундамисиз? — деб сўради гетман.

Улар яна энгашиб, қуллўқ қилиб: «Ҳовва!» дедилар.

— Эсингиздан чиқиб қолмайдими? Үргатганимдай
гапиринг-а!

— Йўқ, отамиз, эсимиздан чиқмайди!

Темирчи запорожъелиларнинг биридан «подшо шу-
ми?» деб сўради.

— Шошма, подшо бу эмас, Потёмкин деган шу бўла-
ди,— деди униси.

Нариги уйдан ғувур-ғувур овоз эшитилди. Этаги узун
шойи кўйлак, орқасида бурмаси бор кимхоб камзул
кийган аллақанча басавлат хотинларни кўриб, темир-
чининг кўзи жавдираб бесаранжом бўлиб қолди. Унинг
кўзига фақат ялтироқ нарсаларгина кўринар эди. Запо-
рожъелилар бирданига ерга йиқилиб:

— Онахонимиз, марҳамат қил! Марҳамат! — деб ба-
қиришди.

Темирчи ҳам кўзига ҳеч нарса кўринмай узала ту-
шиб ётиб олди.

— Туинглар! — деди амирона, лекин ёқимли овоз.

Сарой аҳилларидан баъзилари типирчилаб, запорожье-
лиарни турткилаб қўйдилар.

— Онахонимиз, турмаймиз, ўлсак ҳам турмаймиз! —
деб қичқиришди запорожьелилар.

Потёмкин лабларини тишлар эди, кейин алоҳа бўл-
май ўзи улар тепасига келиб, бирори қулогига шивир-
лади. Шундан кейин турдилар.

Темирчи ҳам жасоратга миниб бошини қўтариб қа-
раса, ўрта бўйли, мовий кўз, упа суртган, тўладан кел-
ган бир хотин, ёлғиз маликаларга хос бўлган жозибали
ширин табассум билан тепасида турибди.

Мовий кўзли хотин запорожьелиларни қизиқиш би-
лан кўздан кечираркан:

— Онҳазрат, бугун, ҳалигача мен қўрмаган халқим
билан таништироқни ваъда қилган эдилар,— деди. Ке-
йин уларга яна яқинроқ келиб:— Тузук қараашяптими
сизларга? — деб сўради.

— Ҳа, онахонимиз, миннатдормиз! Хўрагимиз яхши
(гарчи бу ернинг қўйи бизнижика бўлмаса ҳам), нея
хурсанд бўлмайлик?..

Потёмкин, запорожьелилар унинг ўргатганини гапир-
май бўлакча гап бошлаганларини кўриб, юзини бужмай-
тирди...

Запорожьелилардан бири ўзига оро бериб, олдинроқ-
қа чиқди:

— Онахонимиз, марҳамат қил! Садоқатли халқинг-
дан нима гуноҳ ўтдики, ғазаб қилдинг? Тоторнинг ҳаром
қўлинни тутдикми ёки бирор ишда бадбаҳт турк билан
иттифоқлик қилдикми, феълимиизда, дилимиизда сенга би-
рон хиёнат қилдикми? Нега бизга ғазаб қилдинг! Аввал
эшитдикки, бизнинг хилофимизга ҳар ерда қўргонлар
солишга амр қилибсан, кейин эшитдикки, бизларни ито-
ат қилдириб, сипоҳлик хизматини ўтамоққа мажбур қил-
моқчишишсан, энди яна янги нохуш гаплар эшитиб ту-

рибмиз. Запорожье сарбозларининг гуноҳи нима? Гуноҳи, қримлилар билан уруш қилган қўшинингни Пе- рекопдан ўтказиб генералларингга ёрдам берганимиз- ми?..

Потёмкин қўлидаги қатор-қатор узукларнинг брил- лиант кўзини кичкина чўткачада тозалаш билан овора бўлгандек индамасдан турар эди.

Екатерина меҳрибонлик қилиб:

— Нима тилайсиз? — деб сўради.

Запорожъелилар нима деймиз дегандек бир-бирла- рига қараб олдилар.

Темирчи ичидা, подшо, тилагингиз нима деб сўрайп-ти шекилли, вақт ғанимат, деган хаёл билан тўсаддан ўзини ерга ташлади.

— Улуф шоҳимиз, бир қошиқ қонимдан кечгайсиз, гуноҳимни ўтгайсиз, шоҳона марҳаматингизни аяманг, ғазаб қилмай айтинг, оёғингиздаги кавушингиз қандай матодан тикилган? Бундай кавушни ҳеч бир косиб ти- колмаса керак, ҳеч бир мамлакатда бундай кавуш бўл-магандир. Ё худо, менинг ҳам хотиним шундай кавуш-дан кийса нима қиласмиш!

Малика кулиб юборди. Сарой аҳллари ҳам кулиш-ди. Потёмкин бир хўмраяр, бир кулар эди. Запорожъе- лилар, темирчини жинни бўлиб қолди, деган хаёл билан уни турта бошладилар.

Малика илтифот билан:

— Тур! Муродинг меникидек кавуш бўлса, мушку-линг осон, дарҳол келтиринг, энг қимматбаҳо зар кавуш-дан! Унинг бу соддалиги менга ниҳоятда ёқди! — деди. Сўнгра бошқалардан бир чеккароқда турган, рангпар юзи тўладан келган, катта-катта садаф тугмали камзи-ли унинг саройга даҳлдор эмаслигини кўрсатиб турган кишига тикилиб туриб,— қаранг, сизнинг ўткир қала-мингизга лойиқ бир намуна! — деди,

Садаф тугмалик одам таъзим билан:

— Марҳаматли маликам, лутф ва карамингиз ҳаддан зиёда, бу ўринда лоақал Лафонтен лозимдир,— деди.

— Ростимни айтсам, «Бригадир»ингиз ҳали ҳам ҳаёлимдан кетмайди. Ажаб яхши ўқийсиз!— деди малика. Сўнгра яна запорожъелиларга боқиб: — Бироқ, сизнинг юртингизда уйланишмайди, деб эшитган эдим,— деди.

— Нега, онахонимиз, ўзинг хўп яхши биласанки, одамзод хотинсиз тириклик қилолмайди,— деди темирчи билан гаплашган ҳалиги одам. Темирчи унинг саводхонлар тилини яхши била туриб малика билан гаплашганда жўрттага мужик тили дейилган бундай дағал тилда гапирганини кўриб, ичидা: «Муғамбирлар-э! Бундай қилиши бежиз бўлмаса керак!» деб қўйди.

Ҳалиги запорожъели:

— Бизлар тарки дунё қилганлардан эмасмиз, биз ҳам гуноҳкор бандаларданмиз. Исавиларнинг бариси сингари биз ҳам овқатларга ўчмиз. Орамизда уйлангандар кўп ва лекин улар сечада хотинлари билан турмайдилар. Хотинини Польшага ташлаб келганлар ҳам бор, Украинада хотини борлар ҳам бор, Турк юртида хотини борлар ҳам бор¹.— деди.

Шу орада темирчига кавуш келтирдилар. Темирчи уни маҳкам ушлаб олиб;

— Худоё тавба, мунча чиройли! Улуг малика, муз отгани борганингизда ҳам оёғингизга шунаقا кавуш кийиб борасизми, ажабо! Бундай кавуш киядиган оёқлар қандай экан, тоза қанддан бўлса керак дейман, — деди.

¹ Запорожъенинг одати бўйича у ерга хотин келтирганларга ўлим жазоси бериларди.

Оёқлари рисоладагидек чиройли ва росо бўлган ма-
лика, гарчи қорача бўлса ҳам либоси ўзига ярашгани-
дан келишган дегудай соддадил темирчининг оғзидан
бундай хушомадни эшитиб кулимсираб қўйди.

Маликанинг илтифотидан талтайиб кетган темирчи,
пошшолар бол билан майдан бошқа нарса емасликлари
ростми, яна шунга ўхшаш алланималарни сўрамоқчи бў-
либ туриб эди, запорожъелиларнинг биқинига туртаёт-
ганларини фаҳмлаб, индамай қўя қолди. Малика қария-
ларга боқиб, улардан юртларидаги расм-русумларни су-
ришириб, ҳол-аҳвол сўраб турганида, секин кетига чи-
ғаниб, чўнтағига энгashiброқ: «Дарров мени бу ердан
олиб кет», дейиши биланоқ, ўзини ғовдан нарироқда
кўрди.



Бўзчининг семиз хотини кўчанинг ўртасида бир тўп
хотинни йигиб олиб:

— Худо урсин, сувга чўкди, ёлғон бўлса турган
жойимдан силжимай ўлай! — деб жаврар эди.

— Ахир, мен ёлғон гапириб юрган хотинманми? Бит-
та-яримтанинг сигир-пигирини ўғирладимми? Бирорга
кўзим тегдими, нега менга ишонмайсизлар? — деб бақи-
рар эди, бурни кўк, казакча кўйлак кийган хотин қўли-
ни пахса қилиб.— Темирчи ўзини осганини кампир Пе-
реперчиха ўз кўзи билан кўрмаган бўлса сув ичолмай
ўлай!

Чубникидан чиқиб келаётган даъвоши, бу гапни эши-
тиб:

— Ана холос, темирчи ўзини осибди-я! — деди-да,
можаро қилиб турганларга яқинроқ келди.

— Арақ ичолмай ўлай десангчи ундан кўра, қуриб
кетгур банги! — деб жавоб қайтарди унга бўзчининг хө-

тини.— Сенга ўхшаган жинни бўлса ўзини-ўзи осар эди, сувга ташлади, музни ёриб сувга чўкди! Сенинг шу топда арақхонадан чиққанингни аниқ билсам, унинг сувга чўкканини ҳам шундай биламан.

Бурни кўкарган кампир аччиғланиб:

— Вой манжалақи, шарманда, топган гапини қаранг, ҳар куни кечқурун мунши сеникига кириб юрганини билмайди, деб ўйлайсанми?— деди.

Бўзчининг хотини тутақиб кетди.

— Муншинг нимаси? Кимникига киради? Ёлғончи!

Кўк хитоий мато билан сирма қилиб қуён терисидан тикилган пўстин кийган муншининг хотини можаролашиб турғанлар тепасига бориб:

→ Мунши?— деди чўзиб.— Мунши билан бўлган жазосини ейди, ким айтди?

Бурни кўкарган хотин бўзчининг хотинига ишора қилиб:

— Мунши анавиникига кириб-чиқиб юради!— деди.

Муншининг хотини бўзчининг хотини тепасига ўдагайлаб бориб:

— Сен мочагарми ҳали унга иссиқ-совуқ ичириб, бошини гангитиб юрган! — деди.

Бўзчи хотини орқасига тисарилиб:

— Малъун, нари тур-э! Нари тур-э,— дерди.

— Ҳа, лаънати ялмоғиз, боланг ўлсин илойим, қуриб кетгур, туф башарангга...— муншининг хотини бўзчи хотинининг кўзига туфурди.

Бўзчининг хотини ҳам унинг башарасига туфурмоқчи эди-ю, бироқ, можарони тузукроқ эшитай деб хотинларга яқинроқ келиб турган даъвошининг тарашланган бошига туфуриб юборди. Даъвоши этаги билан башарасини артаркан: «Ҳа, мочагар», деб қамчисини кўтариб дағдаға қилиб эди, хотинларнинг бариси ҳар тарафга тўзиб қочдилар. Даъвоши афт-башарасини артар-

кан, сўкинишини қўймай: «Ҳа, ифлос палид!» — дер эди яланг.

— Шундай қилиб, темирчи сувга чўкибди-да, худоे товба! Хўп уста сураткаш эди-я! Қандай пишиқ пичоқлар, ўроқлар, омочлар ясади! Жуда кучли азамат эди-я, ҳа, — деб қўйди, сўнгра бирпас ўйланқираб тургандан кейин,— қишлоғимизда ундаи одам кам. Қони чида ўтирганимдаёқ фаҳмлаган эдим-а, бечоранинг авози ёмон эди. Ана холос! Кеча бор эди, бугун йўқ! Тарғил байталимни тақалатмоқчи эдим-а!.. — Даъвоши бундай хаёлларга чўмганича аста-аста уйига етиб келди.

Оксана бу хабарни эшишиб ичидан куйди. Переперчи-ханинг ўз кўзим билан кўрдим, деганига, хотинларнинг пойма-пой гапларига унча ишонмас эди, темирчининг хийла тақводор одам бўлиб, ўз жонига ўзи қасд қилишига ҳам ишонмас эди. Лекин қишлоққа сира қайтиб келмайдиган бўлиб, бош олиб чиқиб кетган бўлса ни, ма қиласди? Темирчикдек азаматнинг топилиши қийин. У қизни жуда яхши кўрарди! Ҳеч ким чидолмаган эрқаликларини фақат у кўтариб келаётисиб эди-ку. Гўзал қиз туни билан бетоқат бўлиб, ўрнида тинч ётолмай ўёқдан буёққа ағанаб, тонг отгунча сира ухламади. Гоҳ тун қоронғисида ўзига-ўзи дакки бериб тўлғанар, гоҳ ором олиб, ҳеч ўйламай дер эди-ю, аммо хаёлидан йигит кетмасди. Кечаси билан куйиб-ўртаниб, эрталабгача темирчининг мафтуни бўлди.

Темирчининг тақдирига Чуб хафа ҳам, хурсанд ҳам бўлмади. Унинг фикри ёлғиз бир нарса билан банд: Союзханинг бевафолигини ҳеч унутолмади, уйқуга ётиб ҳам уни сўкар эди.

Тонг отди. Одамлар эрта саҳардан бутхонага келиша берди. Дока рўмол ўраган, оқ мовут камзул кийган диндор кекса хотинлар бутхона эшигидан кирап-кирмағ

чўқинишарди. Кўк ва сариқ нимча, орқасида попукли зар тўн кийган бойвучча хотинлар ҳаммадан олдинда турадилар. Бошига аллақанча ранг-баранг лента боғлаб олган, бўйни тўла маржон, бут ва тангалар тақиб олган қизлар меҳробга яқинроқ бориб олишга ҳаракат қиласардилар. Аммо ҳаммадан олдинда мўйловдор, кокил қўйган, бўйни йўғон, ияги тарашланган, аксариси тагидан оқ, баъзида кўк камзули чиқиб турган, чакмон кийган бою камбағаллар аралаш турадилар. Қаёққа қарасанг байрам кайфияти. Даъвоши рўзасини колбаса билан очмоқ хаёлида тамшанар эди. Қизлар йигитларга қўшилиб, музда учамиз деб суюнар эдилар, кампирлар дуо-фотиҳани бугун астойдилроқ ўқир эдилар. Казак Свербугуз бош эгиб сажда қилганда бутхонадагиларнинг ҳаммасига эшитилар, ёлғиз Оксана ўзидан бехабардек паришон ҳолда турар эди. Намоз ўқиятими, йўқми, маълум эмас. Биридан-бири аlamli, биридан-бири ғамгин туйғулар кўнглига ғам солар, қайғуси шунчалик ошган эдики, чеҳрасида ғаму ҳасратдан ўзга ҳеч нарса кўринмас эди. Кўзига жиқ-жиқ ёш тўлди. Қизлар унинг бу ҳолига сабаб нималигини асло тушунолмадилар, сабаб темирчи экани уларнинг хаёлига ҳам келмади. Аммо хаёли темирчи билан банд бўлган ёлғиз Оксана эмасди. Қишлоқ аҳилларининг бариси на-заридан байрам байрамга ўхшамас, бир нарса етмагандай эди. Аксига олиб, мунши ҳам қопга тушгандан бери хириллаб қолиб, дуони бўғилиб зўрга ўқир эди. қалъадан келган ҳофиз яхши ўқиса ҳам, темирчининг йўқлиги билиниб туради, чунки ибодат вақтида: «Э, бор худоё»ни ёки «ғулмонлар билан»ни ўқиганда темирчи ҳам ҳофизлар ёнига чиқиб, полтавачасига ҳофизлик қилиб кетар эди. Бундан ташқари, темирчидан бошқа ҳеч ким бутхонага мутаваллилик қилмас эди. Эр-

талабки ибодат ўтди, пешингиси ҳам ўтди, лекин темирчи қаёққа йўқолдийкин?



Шайтон аввалгидан ҳам қаттиқроқ жадалига олиб биз зумда темирчини уйига олиб келди. Темирчи қараса, уйининг олдида турибди. Худди шу пайтда хўроз қичқирди. Шайтон қутулдим, деб севиниб кетмоқчи бўлган эди, темирчи унинг думидан тутиб: «Қаёққа борасан? Шошма, биродар, ҳали ишинг битгани йўқ, хизматинг муздини берганим йўқ», деб қўлига гаврон олиб уч марта боплаб урди. Бечора шайтон, маслаҳатчининг даррасини еган камбағалдек жуфтакни уриб қолди. Шундай қилиб, одамизоднинг душмани васваса қилиб, бирорни йўлдан оздираман, деб ўзи таъзирини еди. Кейин Вакула оғилхонага кириб, тушгача пичан ичидаги улади. Уйғонгач, офтобнинг анча кўтарилиб қолганини кўриб, эрталабки намозни ҳам, тушкисини ҳам ўтказиб юборибман, деб капалаги учиб кетди; намозхон темирчи, ўз жонимга ўзим қасд қилиб, имонимни сотмоқчи бўлганимга худонинг қаҳри келиб, мени ғафлат босдирибди, бундай улуғ-айём кунларда бутхонага боролмапман, деб кўнгли анча хира бўлди. Аммо келаси ҳафтада ёқ поп қошига бориб, гуноҳимни айтиб товба қиласай, бугундан бошлаб йил бўйи ҳар куни эллик мартадан сажда қиласай, деган ниятни қилиб уйига кирди; уйда ҳеч ким йўқ. Солоха ҳали қайтиб келмабди шекили, Кавушни секин авайлаб қўйнидан олди, қосибиға қойил қолиб, яна бир марта томоша қилди, сўнгра ўтган кечаси кўрган ажойиботларига хўп таажжубланди. Кейин ювинди, запорожъелилардан олган тўнини кийиб

ясаниб олди. Полтавага борганда олган бўлса ҳам ҳали-
гача сира киймаган тепаси кўк барра телпагини ҳам
сандиқдан олди. Ранг-баранг янги белбоғини ҳам олди:
буларнинг ҳаммасини туғиб, битта қамчинни ҳам қўшиб,
тўппа-тўғри Чубникига жўнади.

Темирчини кўриб Чубнинг кўзи косасидан чиққудай
бўлди. Темирчининг тирилиб келганигами, унинг юрак
ютиб уникига келганигами, ёки бундай ясаниб запорожъ-
елик олифта бўлиб келганигами, қайсинасига ажабла-
нишини билмай ҳайрон бўлиб қолди. Лекин темирчи Ва-
кула тугунни ёчиб, охори тушмаган, оламда мисли йўқ
янги телпак билан белбоғни Чуб олдига қўйиб, оёғига
йиқилганда ва:

— Отам, раҳминг келсин! Мендан хафа бўлма! Мана
қамчин, оёғингга йиқилдим, хоҳлаганингча ур, тавба
қилдим, ур, хафа бўлмасанг бўлгани! Марҳум отам би-
лан дўст эдинг ахир, нон-қатиқ эдингиз, ширикомани
ҳам бирга ичардингиз,— деб ялинганда Чубнинг тааж-
жуби яна ошди.

Қишлоқда ҳеч кимга бўйин эгмаган, ҳеч кимни пи-
санд қилмаган ва бир мирилик чақани қўли билан бе-
малол буккан, шундай темирчи оёғига келиб йиқилга-
нига ичиди хурсанд бўлди. Чуб обрўсини туширмаслик
учун қамчини олиб, унинг елкасига уч марта урди.

— Бўлди, тур! Кексалар сўзини тингла! Ўртамизда-
ги ёмон-яхши гапларни ташлайлик! Қани, гапир, муро-
динг нима? — деди.

— Отам, Оксанани менга бер!

Чуб андак ўйланқираб тургач, телпак билан белбоқ-
ка кўз ташлаб қўйди: телпак ниҳоятда яхши, белбоғ
ҳам ундан қолишмас эди. Солоханинг бевафолиги эсига
тушиб кетиб:

— Маъқул! Совчингни юбор! — деб юборди.

Оксана уйнинг остонасига қадам қўйиши билан те-

Мирчини кўриб, «вой!» деганча ҳайрон бўлиб, суюнганидан унга тикилганича қолди.

— Кўр-чи, қандай кавуш келтирдим сенга! Малика-нинг оёғидаги кавушдан! — деди Вакула.

Оксана кўзини ундан олмай, қўлларини силтаб.

— Йўқ, йўқ, керакмас, кавуш келтирумасанг ҳам мен... — Оксана сўзининг уёғини айттолмасдан қизариб кетди.

Темирчи унга яқинроқ келиб, қўлидан тутди. Барно қиз кўзини олиб қочиб ерга қаради. Қиз асло шу топдагидек гўзал кўринмаганди. Шавқи ошиб шодланган темирчи унинг юзидан секин ўпган эди, юзи қизариб, ҳусни яна ошди.



Марҳум архиерей бир куни Диқанъка қишлоғидан ўтиб бораётганида бу ерни мақтаб, бир кўчада янги солинган уй олдига келиб тўхтади. Ҳазратлари, эшик олдидаги қўлида боласи билан турган чиройли хотиндан:

— Бундай ажойиб сирланган уй кимники? — деб сўрадилар. Эшик олдига турган хотин, таъзим билан:

— Темирчи Вакуланини! — деди.

Хотин Оксананинг ўзи эди. Ҳазратлари уйнинг эшик ва дарчаларини томоша қиласаркан:

— Хўп яхши ишланибdir, яхши! — деб қўйдилар. Деразаларнинг тўрт томони қизил бўёқ билан бўялган, эшикларда оғзида чилими билан от миниб турган қазакларнинг сурати солинган эди. Аммо ҳазратлари Вакуланинг товбасини бузмай текинга бутхонанинг чап томонига кўк бўёқ устига қизил билан гул солиб бўяб берганини эшишиб яна ҳам алқадилар. Бундан ташқари, бутхонага кираверишда чап томондаги деворга, шайтон малъуннинг дўзахда ёнаётган суратини солиб қўйди;

шайтон баччагарни шундай хунук-бадном қилиб солдики, кимки ўтса туфуриб ўтар эди; хотинлар бўлса болалари йиғлай берса сурат олдига олиб келиб: «Анавини қара, мунча тасқара-я!» дердилар. Болалар ҳам дарров кўз ёшларини артиб, суратга бир қингайиб қарапдилар-да, оналарининг бағрига ёпишиб олардилар.

1832.



Г 61

Гоголь Н. В.

Рождество арафасидаги тун. Т. Ёш
гвардия, 1980. 64 б.

Гоголь Н. В. Ночь перед рождеством

ББК 84Р1

На узбекском языке

H. B. Гоголь

НОЧЬ ПЕРЕД РОЖДЕСТВОМ

Издательство «Ёш гвардия» —
Ташкент — 1980

Редактор С Сайдалиева

Рассом А Сухарев

Расмлар редактори А. Фуломов

Техн. редактор Л. Буркина

Корректор С. Сайдалимов

ИБ № 690

Босмахонага берилди 4.04.1980 й. Босишга
руксат этилди 8.09.1980 й. Формати
 $84 \times 108^{1/2}$. 1-босма қоғозга «литератур-
ная» гарнитурада юқори босма усулида
босилди. Босма листи 2,0. Шартли босма
листи 3,36. Нашр листи 2,96. Тиражи 60000.
Буюртма 3402. Шартнома 158—79. Бахо-
си 25 т.

Ўзбекистон ЛКСМ Марказий Комитети
«Ёш гвардия» нашриёти. Тошкент. Навоий
кўчаси, 30.

Ўзбекистон КП Марказий Комитети наш-
риётининг Меҳнат Қизил байроқ орденли
босмахонаси. «Правда Востока» кўчаси, 26.

70301—103
Г 356 (04) —80 139—80 4702101000